

Nsân Kapâyĩ Yesu wĩ na

Yesu Crise ma ngii

¹ Driyẽ wātāhã yaha, wii tuu ma Yāhã Yě Yor u pye le nii wa. U pye Yāhã ne, woo ge pye Yāhã.

² Ke fegbecāã na, u pye Yāhã ne.

³ Woo kāmāy na wān bye tāhã; ngaa wee yĩnde na mii woo sē kē u ta ke n nii ye.

⁴ Woo u ma yrā, yrāṅ wān bye ye, loo yrā n nii cāã- nawee- ye.

⁵ Woo wii u ma pe Cāãfua, u ba dye wamfa nsoho wo, pe wamfa -sē pe cāã- wĩ sye.

⁶ Yāhã n ba dya waa nō wāã, pe naa u yee Nsân.

⁷ Woo n pa ma ba u Cāãfua wĩ gbe yi nawee-ye, pe waha u Cāãfua ta pe Yater.

⁸ U Nsân woo sē kē tuu pye u Cāãfua ye; woo kē Yāhã u nō wāã ma yee u ba u Cāãfua wĩ tōr yar nawee- na.

⁹ Woo Cāãfua nwo ma cĩnde cāã- ne. Woo kē tuu pa driyẽ wo, ma nii cāã- le nawee- wo.

¹⁰ Woo kē, Yāhã driyẽ tāhã u kāmāy na. U pye driyẽ laam wo, pe driyẽfa sē ba u yāṅ cā ye.

¹¹ U pa u terfa ye, u terfa sē -sē ba u sya ye.

¹² Mpāy pe -sē u wĩ sya cĩnde, ma u ta pe Yater, u koho klahasaha wāã poo kē, pe waha nii Yāhã pii.

13 Poo mpây pe see ke syi, waa ntõr kalaa wee ye, waa tyãhã kalaa wee ye, waa syihi wĩĩ sã ne ye, Yãhã wĩĩ ne.

14 Yãhã Yẽ Yor wã klaha nawee, woo kã Yãhã Dya Yesu Crise ne. U n tege ba nawee- nsoho wo. U pa Yãhã laantãr wũhũ ne, tesã cĩĩnde wũhũ ne, wãkuayãã wee te na ye. Wo sã u nayõr yãŋ naa n yai ye, nayõr tii syi Yãhã Dyapuai nen ya kã u ga waha te yãã u Tuhufua Yãhã ye.

15 Nsân u wĩĩ tẽ yi nawee- ye ma yee: «Woo wĩĩ kã tẽ ba pãã ma yee: Wii tuu ga pa ta kur ye, u cer yaha ra kã, u cãã pye ɛ nii wa ra yaha.»

16 Wãkuayãã wee u laantãr wũhũ na ye. U ke wãã wo kã, ma maha kaa taha wo na, wãkuayãã wee ye.

17 Wo faale wãdyaha Musa bii ke Yãhã kãnde yar wo na. Ma sã yee ke laantãr wũhũ na, tesã ke cĩĩnde wũhũ ne, u Yãhã Yĩndefua Yesu Crise woo kã tuu pa koo ngĩĩ ne.

18 Waa sã Yãhã yãã yãã ye, Yesu wii u ma ke Dyapuai nen ya, ma maha ma Yãhã, ma crã nii Yãhã tãy, woo kã tuu Yãhã wĩĩ gbe yi nawee- n ke cã.

Nsân nawee- tããfua yẽ kaplãŋ

(Mat 3.1-12; Mar 1.1-8; Luke 3.1-18)

19 Le kungbãy Yurusalem laam wo, pe Yiifee-yahaseefa pye. Pe n Yãhã yũndefa mpây ɛhɛ wãã, tesã Lewi kur kuɛ pii mpây ne Nsân ye. Pe n yir ke Yurusalem wo, ma ga yi u Nsân na, ma u yey ma yee: «Nwasyifua kã ma ne?»

20 U Nsân sã gbã tã pe na ye, u n le tõr yi gbegbe pe yĩnde na ma yee: «Ndoo sã kã u Yãhã Yĩndefua Crise ne ye.»

²¹ Pe n maha u yey ma yee: «Ah nwasyifua -sẽ kě ma ne? Mboo la Yeli?» Nsân n pe pye ma yee: «Aye, ndoo sê kě ye.» Pe n maha u yey taha ma yee: «Mboo la u Yãhã kaplãŋ tǒrfua?» U n maha yee: «Aye».

²² Pe n u yey taha yahamba ma yee: «Ah nwasyifua -sẽ kě ma ne? Wo yai wo laa loo cã ma wĩ na, wo ga tǒr mpãy ye pe wo lɛɛ. Mii tǒr wo yar nawee wii ter syi kě ma ne.»

²³ Nsân n pe pye ma yee: «Yãhã kaplãŋ tǒrfua Yisa bii le pãã yaha Yãhã sabangbãŋ wo ma yee: <Waa yĩmbui n yi drawaha fla wo, ma nii n yee:

-Ye Yĩŋfua Yãhã wãpaŋ kãnde
gbihi yaha ke kě!> »

Nsân n maha le pãã pe ye ma yee: «Yĩmbui lii le n yi drawaha fla wo, ndoo yĩmbui ne.»

²⁴ Pe tẽnleɛ mpãy pe lɛɛ wãã Nsân ye, Yiifeyahaseefa mpãy pe n yee Farisyẽ, poo mpãy -sẽ pye pe ne.

²⁵ Poo mii n u yey ma yee: «Ke ma pye ma wee u Yãhã Yĩndefua Crise ye, ma wee Yeli ye, ma maha wee u Yãhã kaplãŋ tǒrfua ye, ah nwa -sẽ ta ma n nii nawee- tãã n yi loho wo?»

²⁶ Nsân n -sẽ pe pye ma yee: «Ndo, n nwo, tẽ n nii nawee- tãã loho ne; waa sê ma pe nawee-laam wo, tee sê cã ye.

²⁷ Woo nwo ga ba le koho yigi ra kur ye. U ɛɛ yaha ra kě, ta syi gɛ sê yai u ntãn sale wãfer ne u trɛ na ye.»

²⁸ Koo ngĩ byɛ pye Gbetane wo, Yurdane lafeŋ kũndi ngaa ye, Nsân tuu naa nawee- tãã loho ne na.

Nsân Yesu yee u Yãhã Mbapênge

²⁹ Koo yĩnsyii wo, Nsân n Yesu yãã tuu n pai u fla na, u n pe nawee- pye ma yee: «U Yãhã Mbapênge nwo, wii Yãhã u ta, ma ga driyẽ nawee- kapee- foho gbe kãã pe na.

³⁰ Woo wĩĩ kẽ tẽ ba naa n pãã ma yee: Waa ma tuu ga pa ta kur ye, u cer yaha ra kẽ. U cãã pye le nii wa ra yaha.

³¹ Ndoo bya, n sê ba u cã ye. N pa, ma ba nawee- tãã n yi loho wo, loo le ga waha ta, Yiisrɛfa n waha cã yoo kẽ u ne.»

³² Nsân n le yãã, ma le pãã ma yee: «N Yãhã Yrã Fãnga yãã, le tege yãhãyĩn na kãnsyã waa dyaŋ, ma ba too kuee u yĩn na.

³³ N sê ba u cã ye, Yãhã gi ke -sê ra no wãã ta n ba nii nawee- tãã n yi loho wo, koo ke ba ra pye ma yee: «Wii raa ga ba yãã, ta Yrã Fãnga le ga tege kuee u na, woo kẽ u ga ba naa nawee- tãã ta Yrã Fãnga ne.»

³⁴ Ndoo Nsân loo nde yãã ra yĩnde ne, ma ga le pãã yi, n ye yar woo kẽ u Yãhã Dya.»

Mpãy Yesu u cãã yãŋ yi u kãnyãrwai

³⁵ Koo yĩnsyii wo, Nsân maha pye loo teele nen ya wo, u kãnyãrwai syãm mpãy ne.

³⁶ U n maha ba Yesu yãã tuu n ter. U n maha yee: «U Yãhã Mbapênge nwo!»

³⁷ U Nsân kãnyãrwai syãm mpãy pe pye u ne, pe u kapãn luhu ke syi, pe n taha Yesu na.

³⁸ Yesu n ba klaha yãŋ, ma pe yãã pe u taha n naha, u n pe yey ma yee: «Ah le ma mii?» Pe n u pye pe yor wo ma yee: «Arbi, ma n syã na?» Ke Arbi yĩntaha kẽ kaicãfua.

³⁹ U n pe pye ma yee: «-Ye pa yaa yāŋ!» Pe n ka, maa u syāsaha yāŋ. Ke -sē pye yaiyīn tratra. Pe n koo per yai kua u ne.

⁴⁰ Poo nawee- syām mii, pe ba Nsān kaplāŋ luhu, ma dur yi u kur kuε ye, ma taha Yesu na pe kuāŋ ne, pe laam wo Syimu Pyar cīfua Andere pye.

⁴¹ Andere n cāā ka, ma ga u lεfua Syimu wāā, ma u pye ma yee: «Wo u Meesi yāā.» Ke Meesi yīntaha kē: Yāhā Yīndefua Crise.

⁴² U Andere n Syimu yigi ga Yesu fla na. Yesu n u yāā ma yee: «Mboo sē na Nsān dya Syimu? Pe naa ma yee yagaa Sefase.» Ke Sefase myaha ma wācεŋ Pyar myaha ne. Te myar yīntaha ntēmlaha.

⁴³ Koo yīŋsyii wo, Yesu n le ta woo ga ka Galele kuε kāntraha na. Tuu Filipe wāā sya, u n u pye ma yee: «Naa n taha ra na.»

⁴⁴ U Filipe -sē wāā naa n yi Pyar ne, tesē u cīfua Andere ne klo nen wo, lii pe naa n yee Gbesyata.

⁴⁵ Loo kur ye, Filipe n ga Natanelu wāā sya, ma u pye ma yee: «Faale wo, wii wīl Musa tuu yrūhū le yaha Yāhā sabangbāŋ wo, tesē pe Yāhā kaplāŋ tōrfa u wīl pāā, wo u yāā: Nasaretefa Yosεfe dya Yesu kē.»

⁴⁶ Natanelu n u pye ma yee: «Kayīl lii syi -sē ma, le ga waha yi Nasarete wo?» Filipe n u pye ma yee: «Pa yāŋ!»

⁴⁷ Yesu tuu Natanelu yāā tuu n pai u fla na, u n nde pāā u wīl na ma yee: «Cīinde Yiisrεfa naa waa nwo, dawar wee u laam wo ye.»

⁴⁸ Natanelu n u yey ma yee: «Ma pye mii ma ra cā?» Yesu n u pye ma yee: «N naa ma yāā.

Ma sê pye la nasar nkugu flâhã tãy, Filipe n cã ga ma yee?»

⁴⁹ Loo na, Natanelu n u pye ma yee: «Yĩnfua, Yãhã Dya kē ma ne, mboo maha ma Yiisrē kãntraha Yĩnfua.»

⁵⁰ Yesu n u pye ma yee: «Tē ma pye ma yee, n ma yãã nasar nkugu flâhã tãy, loo ya la le ma ta ma n ra ta ma Yater? Maa maha ba kai- nkãy yãã, ke gboho loo nde na.

⁵¹ Ta n cĩinde nde pãã ye ye, yaa ba naa yãhãyĩn yãã ke yãr n yaha, ye n naa yãhãyĩn tēnlɛ ye yãã pe n dugu, ma dur tege n pai u Nawee Puee fla na.»

2

Yesu loho wã klaha defĩ

¹ Plii tãã kur ye, pe n nii cafãn taa yigi Galele kãntraha na, klo laa wo pe n yee Kana.

² Yesu nahafua pye pe cafãn yigifa ne. Pe n Yesu yee, woo tesē u kãnyãrwai ne, pe n ka te cafãn disaha wo.

³ Pe n nii te cafãn dir di, defĩ n ba kua pe cafãn yigifa ye. Yesu nahafua n u pye ma yee: «Defĩ yãn, tuu kua pe ye.»

⁴ Yesu n u pye ma yee: «Ah yaa, lii ma wo nsoho wo ma ne? Ta yale sē nɔ wa ye.»

⁵ Yesu nahafua n pe dirlafa pye ma yee: «U ma sya yee tee pye mii, -ye pye ke syi!»

⁶ Ke fla -sē na, ntēmbar gbããwɔr kuay raa -sē pye, Yiifēe- pe ba ta, ma naa pe kãnde kapĩ loho ku le naa n yaha.

⁷ Yesu n pe dirlafa pye ma yee: «-Ye loho ku, ye too gbããwɔr nde yĩ!» Pe n loho ku te yĩ tata.

⁸ Loo na, u n pe pye ma yee: «Ye kaa ku gblāhā gaa laam wo, ye ga wāā yāṅ diryīntaha yifua kē!» Pe n kaa ku, ma ga wāā u kē.

⁹ Te lor bye -sē ba wā klaha defīī. U diryīntaha yifua, tuu u wɔ yāṅ, u defīī wātāy n u laam wɔ. U sē cā woo defīītāhā nwo syi yi na ye, mpāy pe -sē ba ke loho ku, poo ba u yisaha cā. U diryīntaha yifua n u cafān yigifua yee ba,

¹⁰ ma ba u pye ma yee: «Ah ndee ngaa dyaṅ, defīītāhā woo pe ma ne cāā la wāā nawee- kē, u ma pe yigi wa pe cā naa ke sahasaha la, ah mboo -sē koho far u defīītāhā na u n sya yagaa dye.»

¹¹ Yesu u laanwɔ wūhū wāpyeṅ koho fe yigi koo syi. Le pye Galēle kāntraha klo nde wo pe n yee Kana. U u ya yi yar ke syi, u kānyārwai n u wīī sya cīinde.

¹² Loo kur ye, u n ka Kapornu wo, u nahafua ne u cīifa ne ma suhu u kānyārwai ne. Pe n ga kuee ke fla na, ma plii raa pye.

Yesu laam war pe Yiifee- ne Yāhā kangbāṅ wīī na

(Mat 21.12-13; Mar 11.15-17; Luke 19.45-46)

¹³ Yiifee- syayaha gbar te ba nɔ gbe taha, Yesu n ka Yurusalem wo.

¹⁴ Yāhā kangbāṅ kāndi wo, u n nyer parfa yāā, mbaa parfa ne, nasar kate parfa ne, ma maha war turfa bya yāā pe tege niī ga pe tabal tāy.

¹⁵ Yesu n namihi ta, ma sāngblā fan, ma pe bye kar yi wāā ke Yāhā kangbāṅ nkur ye, pe mbaa ne, pe nyer ne. Ma dur, ma war turfa tabal tra cāār wāā pe kē, pe war n yrāhā,

16 ma nasar kate parfa pye ma yee: «-Ye pe gbe yi kãã nwo! Ya'a syi ta Tuhufua Yãhã kaha ta ye cãtrohosaha ye!»

17 Yesu tuu nde pãã, u kãnyãrwai n Yãhã sabangbãñ kapãn nde tai cã, nde le n yee:

«Yãhã, ma kaha wĩ sronj gboho ra laam wo, mii naa dyañ ke ga ba ra suhu tãñ.»

18 Yiifee- yahaseefa pe u yãã nde pyesaha wo, pe n ba u yey ma yee: «Taa nwo taa nde pye ke syi, laanwo wĩ lii loo taa -sẽ ga pye, wo n waha cã ma tãhã kẽ le wãpyeñ ne?»

19 Yesu n pe pye ma yee: «-Ye Yãhã kangbãñ nge yoho yãñ, yaa yãã plii tãã wuhu, n ke fãã le!»

20 Pe Yiifee- yahaseefa n u pye ma yee: «Yãhã kangbãñ nge wãfããtãñ ke dya- gbeesĩ wũhũ kuay gbe, mboo ma -sẽ yee, pe ma ke traha, taa ga waha ke dur fãã kua plii tãã ya!»

21 Yesu -sẽ nwo, ngii u naa n yãñ, koo kẽ u ya koho kadye ne.

22 Koo kẽ tuu ba ku, plii tãã wuhu u n yir gbã wo, ma pa gbaafa ye, u kãnyãrwai n ke kaplãñ tai cã, tuu ba nkãy pãã. Loo nde n pe ta pe n Yãhã sabangbãñ kai- sya cĩnde, ma suhu Yesu yẽ kaplãñ nkãy ne tuu ba tõi.

23 Yesu tuu pye ke dyañ Yurusalem wo, te syayaha gbar cãã na, laanwo wũhũ nkãy tuu naa n pye, koo ngĩ n ba ta nawee- mpãy n u wĩ sya cĩnde.

24 Yesu sã -sẽ ba sya ma koho taha yaha pe wĩ na ye. U tee ba pe cã laha, poo tesẽ pe laam wũhũ bye ne.

25 U sē naa n ke pe naa nawee wĩ tōr u ye ye; u ma nawee yāŋ, u u laam wũhũ bye yāã.

3

Yesu Nikodemu ne

1 Yiifee- yahaseefua waa -sē nwo tuu pye, pe naa n yee Nikodemu. Farisyẽ ba kē u ne.

2 Per gaa yĩmper wo, u n ba yi Yesu na, ma u pye ma yee: «Yĩnfua, wo cã Yāhã kē ke ma nɔ wãã, taa ba wo klaha. Mii loo sē ne ye, laanwo wũhũ nkāy taa n pye ngĩ, waa wee tuu ga waha ke syi pye Yāhã ma yee ke wee ufua ne ye.»

3 Yesu n u pye ma yee: «Ta n cĩnde nde pãã ma yee: Waa wee tuu ga waha Yāhã Yai yāã mii u sē gbihi dur see ye.»

4 Nikodemu n u yey ma yee: «Le ga waha pye mii? Naweedyaha ga maha waha gbihi see la? U ga waha dur dye la u nahafua laam wo, u maha gbihi see?»

5 Yesu n u pye ma yee: «Ta n cĩnde nde pãã ma ye: Wii ma yee u sē see loho ne tesē Yāhã Yrã Fānga ne ye, u saa waha dye Yāhã Yai wo ye.

6 Wii ma see kadye sraha na, u ga nii kadye sraha kla ya; wii ma see Yāhã Yrã ne, u ga nii Yāhã Yrã Fānga kla.

7 Ma'a syi ta nde n ma laam wo ye, nde tē pãã ma yee: Ye yai ye gbihi dur see!

8 Teflaha ga naa n gbã teelii ma ke tãy, ma n naa ke gblen luhu, ma sē -sē ga waha ke yirsaha cã ke kasaha ne ye. Yāŋ, nawee wii ma gbihi dur see Yāhã Yrã Fānga ne, u ma ke syi.»

9 Nikodemu n maha u pye ma yee: «Loo nde syi -sê ga waha pye mii?»

10 Yesu n u pye ma yee: «Mboo wii taa Yiisrefa klaha Yâhâ kai- ne, ma -sê maha pye mii ma sê koo ngĩ cã ye!

11 Ta n cĩnde nde pãã ma ye: Nkây too cã, koo too n pãã; nkây too yãã yĩnde ne, koo too n yar nawee- na. Ye -sê koo ngĩ bye sye yaha wo na.

12 N ma nii kântraha wũhũ tór ye ye, ye ma yee ye sê -sê koo sya ye, ye -sê ga ba pye mii ye yâhâyĩn wũhũ koo sya ra ye, nkây yĩn ke n yi yâhâyĩn na?

13 Ma yi kãã u Nawee Puee na, woo wii u yir yâhâyĩn na ma tege ba kântraha na, waa wee wii tuu dugu ga yãã yâhâyĩn na, ma yâhâyĩn kai- cã ye.

14 Faale wo, tẽyãfũũ klo wo, Musa sê bii kayârnowoho wra ta la kãĩ na, ma ke kuã yir ta? U Nawee Puee bya yai u ba kuã yir ta ke syi.

15 Loo nde n nii, wii ma u ta u Yater, u cĩnde yrã yãã wa, lii wãkuayãã wee le na ye.»

16 Nawee- ntãn sron dye Yâhâ tãy, ke n sya ke Dyapuai nen ya yi wãã, nawee wii ma u ta u Yater, u wĩ saa klaha- yãã ye, u cĩnde yrã yãã wa, lii wãkuayãã wee le na ye.

17 Yâhâ sê ke Dya nɔ wãã drier wo ma yee u ba nawee- sãhã pe kapee- wãpye wĩ na ye. Ke u nɔ wãã nawee- wãsyayaha yĩmbui ne.

18 Wii ma u ta u Yater, ufua saa wãpẽn yãã ye. Wii ma -sê kãntuhu le u wo, woofua u ya le wa wãpẽn kãnde wo, u tee sye u saa Yâhâ Dyapuai nen ta u Yater ye.

19 Nwa ta nawee ga ba pën u kapee- wãpye wĩ na? Wii u ma Cããfua, u pa driyẽ laam wo, wam wĩ n -sẽ tãy nawee- ye, ma ter cãã- yaha. Pe pyer tee pee ter, koo kē.

20 Nawee wii woo ma kapee- pye n wa, cãã- wĩ ma ne fũhũ u ye. U saa pa cãã- fla na ye. U ntãnc̄er ma ne gboho u pyerpeer wãyi wĩ ne cãã- na, koo kē.

21 Wii ma -sẽ kayĩ yigi, u ga pa cãã- fla na, u ga naa u kai- pye Yãhã yor wo, u troho wãtãhã ter ne, te n naa n yãã cãã- na.

Yesu tesẽ Nsân nawee- tããfua ne

22 Loo kur ye, Yesu n ka u kãnyãrwai ne Yude kãntraha na. Pe n kuee koo fla na, ma nawee- tãã naa n yi loho wo.

23 Nsân bya -sẽ pye, tuu naa nawee- tãã Yeno wo, loho pye gboho koo fla nge na. Ke Yeno pye Salimu tãy. Nawee- naa n gaha ke fla na, maa naa n tãã u ye.

24 Koo cãã nge na, pe sã ba u Nsân le wa nwomp̄ihi wo ye.

25 Per gaa, sãnker n dye Nsân kãnyãrwai mpãy nsoho wo Yiifee naa waa ne, gbegbe wãni wĩ na.

26 Pe n pa Nsân fla na, ma ba u pye Yesu wĩ ne ma yee: «Yĩnfua, dya wii tuu pye ma ne Yurdane kũndi ngaa ye, wii wĩ taa ba yee mboo tãr ma nawee- yar, awa, u bya nwo tuu yee woo nawee- tãã naa n yi loho wo, nawee- bye ter n tãŋ u kue ye.»

27 Nsân n pe yẽ sya ma yee: «Waa saa waha ngaa ka yãã, mii Yãhã sã kē ke ke wãã u kē ye.

28 Yii γε le cã, ye ga waha le t̄r nawee- ye t̄e yee, ndoo s̄e k̄e u Yãhã Yĩndefua Crise ye. Ndoos̄e k̄e t̄e n̄o wãã u yahasee ye.»

29 Nsân n nde pãã kakuãcran ne pe ye ma yee: «Cafãn yigifua, cafuẽ ma woo wũũ. U cafãn yigifua naambiyã, woo -s̄e ga yer u tãy, u naa u kaplãŋ luhu. U cafãn yigifua yĩmbui ga naa nuhu yigi u k̄e. Too nuhu nde syi ma ndoo wãn, ta laam n flege yi tãŋ.

30 Yesu woo na tes̄e ndoo ne, woo myaha yai ke naa n yi, ndoo wãŋ ke naa n too.»

Yesu woo tuu yi yãhãyĩŋ na

31 Wii tuu n yi ncaha ye, u ma wãn bye yĩŋ na, nawee- bye ne. Wii tuu -s̄e n yi kãntraha na, kãntrahafua k̄e u ne, u kãntraha kai- cã n pãã. Wii tuu n yi yãhãyĩŋ na, woo tuu ma wãn bye yĩŋ na.

32 Nkãy tuu yãã, nkãy ne tuu luhu yãhãyĩŋ na, koo tuu n pãã. Nawee- -s̄e u kaplãŋ sye.

33 Wii u yi yãhãyĩŋ na, nawee wii ma -s̄e yĩntaha sron̄ woo kaplãŋ ye, ma u troho tãhã u yor wo, ufua le cã ma maha le yar Yãhã wĩ ma cĩinde.

34 Wii Yãhã u n̄o wãã, Yãhã kaplãŋ koo k̄e u n pãã. Yãhã ke Yrã Fãnga wãã u k̄e wãkuayãã wee ye.

35 U Dya ntãŋ dye u Tuhufua Yãhã tãy, ke n -s̄e ke kai- bye le soho u koho wo.

36 Wii ma u Dya ta u Yater, u cĩinde yrã yãã wa, lii wãkuayãã wee le na ye. Wii ma -s̄e yee u s̄e u ya le soho u Dya koho wo ye, u saa loo

cĩinde yrã yãã ye. Yãhã ncafũhũ ga kuee woofua na yalebye.

4

Yesu tesẽ Syamarifasya waa ne

¹ Farisyẽ ye n luhu, a ter nawee- naa n taha Yesu na; tesẽ u maha nawee- tãã naa n yi loho wo, ma ter Nsân yaha.

² Yesu ge sã kã u naa pe tãã ye, u kãnyãrwai me pe naa pe tãã.

³ Yesu tuu yi nde cãŋ na, u n yi Yude kãntraha na u kãnyãrwai ne, ma ter Galele kãntraha kue ye.

⁴ Yesu ba yai u ter Syamari kãntraha ne.

⁵ U n ga nɔ gbe taha Syamari kãntraha klo laa na, pe naa n yee Syisyar. Le pye tũntũn tar raa ne, tar rii Dyakuba tuu bii wãã u dya Yosefe kã faale wo.

⁶ Koo fla nge na, u Dyakuba kualan pye. Yai pye yĩŋ wo, yrãhã n Yesu fãŋ, u n tege nii ke kualan ngben na.

⁷⁻⁸ U kãnyãrwai ba ter le klo laam wo, dir keparsaha wo.

Syamarifasya waa n -sẽ pa loho kusaha wo. Yesu n u pye ma yee: «Yõ ra na lawɔŋ ne.»

⁹ U Syamarifasya n Yesu pye ma yee: «Ah ndee Yiifee naa kã ma ne. Ah le yigi mii, ma n lawɔŋ ke ndoo Syamarifasya ye?» Yiifee- naa n fã Syamarifa na, koo kã u cɔɔ n naa n pãã ke syi.

¹⁰ Yesu n u pye ma yee: «Kayĩ lii Yãhã le ta, ma'a ne pye taa le cã, ma suhu wii ne nwo tuu

nii lawoŋ nar ma ye, mboo raa ne ga dur, ma u nar u ma kē cīnde loho ne.»

¹¹ U cɔɔ n u pye ma yee: «Yīŋfua, laku kla sē -sē wee ma ye ye, ke kualaŋ maha n cuhu, mboo -sē ga waha pye mii ma koo loho yāā?»

¹² Wo faale wādyaha Dyakuba kē, tuu koo kualaŋ nge yaha wo kē. Kualaŋ gii tuu loho wo ke na, woo, tesē u pii ne, ma suhu u yar ne. Mboo laam wo, ma yee la ma ter u yaha?»

¹³ Yesu n u pye ma yee: «Wii ma sya kualaŋ nge loho wo, loho fāā ga maha ba u yigi.

¹⁴ Wii ma -sē loho nge wo, kii tē ga wāā u kē, loho fāā saa u yigi yāā ye. Koo loho gii tē ga wāā u kē, ke ga nii plege dyaŋ u laam wo, plege gii ke cīnde yrā wāā, lii wākuayāā wee le na ye.»

¹⁵ U cɔɔ n u pye ma yee: «Yīŋfua, ta kē koo loho nge ne, loho fāā ma n maha ra yigi yāā ye. Loo na, n saa maha pa yāā lakusaha wo ye.»

¹⁶ Yesu n u pye ma yee: «Ka, ma ga ma puai yee, -taa pa!»

¹⁷ U cɔɔ n u yē sya ma yee: «Puai wee ra ye ye.» Yesu n u pye ma yee: «Cīnde ne taa pāā nde, puai wee ma ye ye.

¹⁸ Ma nii ter wa pa bua ye; taa sya maha ma naa wii ye yagaa, ma puai sē kē u ne ye. Ma cīnde pāā loo nde ne.»

¹⁹ U cɔɔ n u pye ma yee: «Yīŋfua, Yāhā kaplāŋ tōrfua kē ma ne.

²⁰ Wo faale wāle Yāhā wāā le sey pe ya na yāŋ nge yīŋ na, ah yii Yiifee- -sē yee Yāhā yai ke naa n sey Yurusalem ya wo.»

²¹ Yesu n u pye ma yee: «Cɔɔ, koho taha yaha ngĩ na tē ga tōr ma ye: Yale laa nde le n pai, Yāhā

wãsey sê pai nii Yurusalem ya wo, ma suhu yãñ nge fla ya ne ye.

²² Yii Syamarifa, tee ngii sey ye sê ke cã ye; wii Yiifee- -sê mii, too ngii sey wo ke cã, ma cã u Syayahafua yĩñ yi Yiifee- wo.

²³ Yale laa sê ma le n pai, le nɔ wa gɛ nɔ wa, mpãy pe Tuhufua Yãhã sey cĩnde, pe ga ba naa ke sey ke Yrã Fãnga ne, ma suhu cĩnde ne. Tuhufua Yãhã poosyi Yãhã seyfa kɛ.

²⁴ Yãhã ma ke Yrã Fãnga. Nawee- yai pe naa ke sey ke Yrã Fãnga ne, ma suhu cĩnde ne.»

²⁵ U cɔɔ n u pye ma yee: «N le cã, u Yãhã Yĩndefua wii pe n yee Crise, u ga pa. U ma pa, u ga ba ke byɛ yĩntaha tɔr u wo yar.»

²⁶ Yesu n u pye ma yee: «Ndoo kē woo, ndoo wii tē n pãã ma ne.»

²⁷ Loo yale nde -sê wo, Yesu kãnyãrwai n ba dye. Pe Yesu yãã tuu n pãã cɔɔ ne, le n pe laam wo. Pe sê -sê sya ma u yey nde ne ma yee, lii raa n pãã u ne laa, nwa ta ma n nii n pãã u ne.

²⁸ Loo na, u cɔɔ n u laku kla ta yaha ke fla na, ma dur ga klo laam wo, ma ga nawee- pye ma yee:

²⁹ «-Ye pa ye ba dya waa syi yãñ! Kai- nkãy byɛ tē pye tɛr, u ke byɛ tɔr ma ra yar. Laa na, woo ga kē u Yãhã Yĩndefua Crise ne.»

³⁰ Pe byɛ n yi le klo wo, ma n gaha Yesu fla na.

³¹ Yaliile u cɔɔ tuu ba tɛr klo laam wo, Yesu kãnyãrwai naa u nar ma naa n yee: «Yĩñfua, ngaa sya di.»

³² U n -sê pe pye ma yee: «Ndoo, kadiñ kla gaa ma ra ye, tee sê kii cã ye.»

33 Pe kānyārwai n nii pe ya yey ma yee: «Waa yāã pa la u kē digi kla ne?» Yesu n pe pye ma yee:

34 «Ta digi kē lii ne, n naa n luhu ta Tuhufua Yāhā ye, koo gii ke ra lēhē wāã. Tesē, kai- nkāy tuu yee tē pye, n koo bye pye kua.

35 Yii sē n yee la, a digi ma tãhã le kãntraha wo, mii yrey resyar sē kē ye, ke sē yāã n gbe ye? Ndo -sē ga ye yar, -ye yīŋ kuā yir ye nabuar nde yāŋ te n pai, te ma mii tar digi dyaŋ ke nɔ wa wāgbenj na!

36 Mii wii dyaŋ tuu dir gbe ma te le pɛn wo, u dāãn yāã, wii tuu nawee- wāã ma pe le Yāhā kãnde wo, u ma pe yāã pe cĩnde yrā yāã, u nuhu di. Loo ne, wii tuu n tãhã, tesē wii ne tuu re gbe, pe nuhu wāã n di pe syām.

37 Cĩnde ne pe le pãã ma yee: Nawee waa n tãhã, waa -sē re gbe.

38 Ndo, n ye nɔ wāã, yaa dir gbe tar wo, tii tee sē te tēn tē ye. Mpāy me pe re tēn tē, yii -sē ga ta ter le tēn ne.»

39 Le klo wo, Syamarifa busãã ba Yesu ta pe Yater. U cɔɔ tuu ba le pãã u klofa ye, a kai- nkāy bye woo ba pye ter, Yesu ke pãã woo ye, koo kē.

40 Loo ne, pe n pa Yesu fla na, maa u sron nar tuu ga kuee poo ne. U n kuee pe ne plii sī.

41 Mpāy pe -sē ba u Yesu yē kaplāŋ luhu, ma u ta pe Yater, poo wānihi ba ter pe faale wām yaha.

42 Pe n nii u cɔɔ pye ma n yee: «Ma kapān ya sē ne le wo ta wo n u ta wo Yater ye. Too lii luhu u ye wii ya, loo bya le wo ta wo n u ta wo Yater. Wo cã cĩnde, woo kē driyēfa Syayahafua.»

Yesu klokai- yahaseefua waa dyalaale jaa

43 Yesu tuu plii sīi pye wa pe Syamarifa fla na, u n yir, ma ka Galele kântraha na.

44 Woo gε naa le pãã, a ter Yãhã kaplãn tōrfua woo sē fihĩ nagboho yãã u kusey wo ye.

45 Tuu -sē ga dye Galele wo, pe Galelefa n u yigi yõ. Pe ba Yesu yãã pe ya ndoŋ, tuu naa laanwo wũhũ pye Yurusalem wo, syayaha gbar na. Pe bya ba ka te gbar na.

46 U n dur ba ke syi Kana wo. Koo fla kē u ba loho wã klaha defĩ. Klokai- yahaseefua waa pye Kapornu wo, u dyale sē pye wãwee u ye ye.

47 U klokai- yahaseefua tuu le luhu, a ter Yesu ma tuu yir Yude kântraha na, ma pa Galele wo, u n yir ga u fla na, ma ga u nar u pa Kapornu wo, u ba woo dya jaa woo kē, a u ma tuu kuee wale nen ya ma ga ku.

48 Yesu n yee: «Yii poo na, ya'a yee ye sē yēkã wũhũ yãã laanwo wũhũ ne ye, ye saha ra ta ye Yater ye.»

49 U klokai- yahaseefua n u pye ma yee: «Yĩnfua, pa wo n ter ra fla na, ta dyale ma syi le ba ku wo yaha ye.»

50 Yesu n u pye ma yee: «Dur ga ma kaha wo, ma dya wlohō yi, u ma yrãn na.» U yahaseefua n Yesu kapãn sya cĩinde, ma ter.

51 Kãnde wo, u tēntē- mpãy n u wãã, ma u pye ma yee: «Ma dya sē yãã ku ye, u yir.»

52 U n pe yey u wãpuar yale ne. Pe n u yē wãã sya ma yee: «Niinge yaiwlan kē, yrĩŋ ke ne dye u tãy.»

⁵³ U dya tuhufua n cã loo yale ne Yesu u ne u pye u dya wloho yi wa. Woo tesê u nna ne, pe n Yesu ta pe Yater.

⁵⁴ Yesu tuu yir Yude wo, ma ka Galêê wo, ke têhê syãñ wuhu ba kê tuu laanwɔ wĩ pye Galêê wo.

5

Yesu tãnkurfua jaa kanii per wo

¹ Loo kur ye, Yiifee- gbar raa pye, Yesu n dugu ga Yurusalem wo.

² Le klo dyesaha neñ gaa pye, pe naa ke yee mbaa dyesaha. Loho gaa pye ke fla na, pe naa ke yee yeberê yor wo Gbesyata. Pe ba ntẽmbar laankongbã y wã y bua raa fãã ke loho tã y.

³ Yanfa sã y naa n nii ke flãhã tã y: Fũũ-, tãnklahafa ne, tãnkurfa ne. [Pe naa ke loho wã yir sê ñ.]

⁴ Yãhã yĩñ tẽnlehê waa pye, yalaale wo u ga tege dye, u ke loho gblaha ke n yir. Ke loho ma yir wa, yanfua wii ma cãã tege dye pe yanfa bye yaha, u ga jaa, te ma sya pye yan tii syi ter.]

⁵ Koo fla na, yanfua waa pye, ke dyê- gbey sênsye wĩhĩ kuatãã ba kê yan pye u na.

⁶ Yesu tuu ba nɔ ke fla na, u n u yanfua yãã tuu sã y nii, u n cã yan ma- u na. U n u yanfua yey ma yee: «Ma n traha la ma jaa?»

⁷ U yanfua n u yẽ sya ma yee: «Yĩñfua, ke loho ma yir, waa wee ma ga ra gbe dye farfar ke laam wo ye. N ma yir ma n gaha, n gaha yãã waa cãã dye ra yaha.»

⁸ Yesu n u pye ma yee: «Yir, ma ma kasã y wãñ gbe, ma naa n yãr!»

⁹ Le yalebya wo, u dya n jaa, ma u kasāy wāŋ gbe ma n yār.

Koo per pye Yiiffee- kani per.

¹⁰ Wii tuu ba jaa, Yiiffee- yahaseefa n u pye ma yee: «Kani per kē nanga, ma sē yai ma ma kasāy wāŋ gbe ma naa n yār ke ne ye.»

¹¹ U n pe yē sya ma yee: «Wii u ra jaa, woo u ra pye, n ta kasāy wāŋ gbe, n naa n gaha.»

¹² Pe n u yey ma yee: «Dya wii woo tuu ma pye, ma ma kasāy wāŋ gbe, ma naa n gaha?»

¹³ Dya wii tuu ba jaa, u sē ba cā yoo kē ye. Yesu ba wloho yi pe nabuar laam wo, ma tɛr, koo kē.

¹⁴ Loo kur ye, Yesu n ba u yāã Yāhā kangbāŋ wo, ma u pye ma yee: «Ma sē yāã, ma jaa. Ma'a syi ma kapee- pye nantāŋ ye. Mii loo sē ne ye, kapee laa ga waha ma dye, lii le pee tɛr.»

¹⁵ U dya n tɛr, maa le pāã pe Yiiffee- yahaseefa ye ma yee, a Yesu kē tuu ba u jaa.

¹⁶ Loo nde n ta pe n nii Yesu ke yīntayāhā ne. Pe n ba u yāã ma u pye, a u tee kai- ngī pye kani per wo.

¹⁷ Yesu n -sē pe yē sya ma yee: «Ta Tuhufua Yāhā ma tēn na yalebyɛ; ta bya, n ma tēn na yalebyɛ.»

¹⁸ Pe Yiiffee- yahaseefa n yee, a nwa ta Yesu n nii Yāhā yee u Tuhufua, ma yee woo ma wācɛŋ ke ne. Tuu maha plaha, ma yanfua jaa kani per wo. Koo ngī wī na, pe naa u ke wāboo yīmbui ne.

¹⁹ Yesu n pe yē sya ma yee: «Ta n cīinde nde pāã ye ye: -Ye yāŋ, u Yāhā Dya saha laa pye u ya kāmāy na ye. Tuhufua Yāhā ke lii pye, loo ne u

n yāã ma n pye. Lii Tuhufua Yāhā ke n pye, loo ceŋ ya kē ke Dya n pye.

²⁰ Ye sē yāã, u Dya ntāŋ dye Tuhufua Yāhā tāy. Kai- nkāy bye ke n pye, ke ke bye yar u na. Kai- nkāy ke gbaha ngĩ na, ke ga ba ke yar u na, le n yē gbāã ye na.

²¹ Ye sē yāã, Tuhufua Yāhā ke nakur ta te n yir gbā wo, ma dur n pai yrāŋ na gbaafa ye mii syi dyaŋ, wii ntāŋ ma dye ke Dya tāy, u bya ga waha yrā wāã ufua kē.

²² Tuhufua Yāhā sē waa sāhā ye, ke te kasāhā bye le soho ke Dya koho wo.

²³ Ke yee nawee- pe naa ke Dya sey, mii pe koo gε sey mii syi dyaŋ. Wii ma yee u sē ke Dya sey ye, ufua sē Tuhufua Yāhā gε sey ye, koo gii ke ke Dya nɔ wāã.

²⁴ Ta n cĩinde nde pāã ye ye: -Ye yāŋ, wii ma ra kaplāŋ luhu, ma maha Tuhufua Yāhā ta u Yater, koo gii ke ra nɔ wāã, ufua cĩinde yrā yāã wa, lii wākuayāã wee le na ye. Ufua saa pēn nantāŋ ye. U ma mii u ku, ma yir wa gbā wo, ma cĩinde yrā yāã wa.

²⁵ Ta n cĩinde nde pāã ye ye: -Ye yāŋ, yalaa ma le n pai, le nɔ wa gε nɔ wa, mpāy pe ku wa pe ga ba naa Yāhā Dya yĩmbui luhu. Mpāy ma ba le luhu, pe ga ba cĩinde yrā yāã.

²⁶ Ye sē yāã, yrā le n yi Tuhufua Yāhā ye mii, ke ke Dya ta yrā ga waha yi u bya ye koo syi.

²⁷ Ye sē yāã, nawee- wāsāhā kānde wāã u Nawee Puee kē.

²⁸ Ta kaplāŋ ngĩ yē gbāã la ye na? -Ye yāŋ, yalaa ma le n pai, mpāy pe ku ter wa, pe ga ba u

Yāhā Dya yĩmbui luhu, pe yir gbā wo, pe nii yrān na.

²⁹ Pe laam wo, mpāy pe naa kayūhū pye, pe ga ba yir pe cĩnde yrā yāā, lii wākuayāā wee le na ye. Mpāy pe -sē naa kapee- pye, poo ga ba yir pe wāpēn yāā, kii wākuayāā wee ke na ye.

³⁰ N saha laa pye nii ya ye. Yāhā yee n naa n pye mii syi dyaŋ, n nawee- sāhā koo syi. Ta kasāhā n sroŋ, ta ya laam wĩ sē ne tē n kar ye. Yāhā gii ke ra nɔ wāā, koo laam wĩ ne tē n kar.

³¹ Le ma pye ndoo ya tē nii wĩ pāā, nawee-saha cā cĩnde ne ye.

³² Yāhā ra wĩ pāā; n cā ke kaplāŋ ma cĩnde.

³³ Ye mpāy lehe wāā Nsān ye, u n ga le cĩnde wĩ pāā pe ye ra wĩ na.

³⁴ N sē -sē n ke nawee u naa ra wĩ pāā ye. N kai- ngĩ pāā ye ye, ye n waha ba sya yaha.

³⁵ Nsān pye mii naaloho wāŋ syi dyaŋ ke n tar, ma n yehe. Ye n pa, ma ba faa ma- pe cāā- na, ma nuhu di.

³⁶ Kai- nkāy ma ke ter Nsān wūhū yaha. Ye sē yāā, Tuhufua Yāhā tuu ra taha tēŋ nkāy na, ta n nii n tē, koo tēŋ ngĩ le yar ma yee Tuhufua Yāhā kē ke ra nɔ wāā.

³⁷ Tuhufua Yāhā gii ke ra nɔ wāā, koo gε ra wĩ pāā. Ye sē ke yĩmbui luhu yāā ye, ye sē ke yĩntaha yāā yāā ye.

³⁸ Ke ndoo wii nɔ wāā, ye sē ra ta ye Yater ye, koo kē ye sē ke kaplāŋ le yaha ye laam wo ye.

³⁹ Ye Yāhā sabangbāŋ wūhū kal, ma cā ke ga waha ta ye n cĩnde yrā yāā, lii wākuayāā wee le na ye. Koo sabangbāŋ -sē kē ke ra wĩ pāā.

⁴⁰ Ye -sē maha sye, ye saa pa ra ye, ye ba cīnde yrā yāã ye.

⁴¹ N sē n ke nawee- pe naa ra myaha gboho ye.

⁴² N -sē cā ma yee, ye laam wo Yāhā wī sē n tāy ye ye ye.

⁴³ N pa Tuhufua Yāhā myaha ne, ye -sē ra wī sye. Wī syi u n pai u ya myaha na, ye woosyfua wī sya.

⁴⁴ Tee mii, ye myaha ke yii ye, ye sē myaha ke Yāhā ya ye ye, loo ne ye saha ra ta ye Yater ye.

⁴⁵ Ye ma syi ye le ga ye yee, ndoo tē ga ba ye wāpee wī pāã ta Tuhufua Yāhā yaha ye ye. Yāhā kānde nkāy faale wādyaha Musa ke yar, koo kē ke n pai ye yigi, koo nkāy tee koho taha yaha ke na.

⁴⁶ Ye sē yāã, Musa ra wī cāã yrūhū yaha; ye ma ne pye ye u kaplāŋ sya cīnde, yaa ne ra bya kaplāŋ sya cīnde.

⁴⁷ Nkāy tuu cāã yrūhū yaha, ye ma yee ye sē koo sya cīnde ye, ye -sē ga pye mii ye ra kaplāŋ sya cīnde?»

6

Yesu digi wāã naam nyersū yībua kē

(Mat 14.13-21; Mar 6.30-44; Luke 9.10-17)

¹ Loo kur ye, Yesu n ka Galele langbāŋ kūndi ngaa ye; pe maha ke yee Tyiberyati langbāŋ.

² Nabuar naa n taha u na. Pe naa u yāã u laanwo wūhū pye ma yanfa jaa, koo kē.

³ Yesu n dugu nii yāŋ gaa yīŋ na, u kānyārwai ne.

⁴ Yiifee- gbar tii pe n yee syayaha gbar, te ba gbe taha.

5 Yesu n yee woo ga yāŋ, ma yāā nabuar n nii n pai u ye kacān wee ye. U n Filipe pye ma yee: «Waa dir yāā na, wo par wāā pe bye kē pe n di?»

6 Yesu tuu ga lii pye, woo gε ba le cā wa; u ba Filipe yey yāŋ ke dyaŋ, ncā u ga lii pāā laa.

7 Filipe n u yē sya ma yee: «Wa'a sya war nagbey bur yāā par, te saa yai gε yai pe bye n waha yāā pe pye di yāŋ cacar gε ye.»

8 U kānyārwe waa, u myaha Andere, Syimu Pyar cīfua kē, woo n Yesu pye ma yee:

9 «Dyalaale ma nwo, bur bua ne tesē fua- syām ne le ye. Te ga waha lii yō nabuar nde syi kē?»

10 Yesu n yee, pe pe nabuar ta pe n tege nii. Nyē pye ke fla na busāā. Pe n tege nii. Pe ba naam nyersī yībua kua.

11 Yesu n te bur gbe, ma Yāhā pye ma yee: «Ma syaha kē,» ma te bur la klaha mpāy bye kē pe ba tege nii. U n maha fua- wāā pe kē koo syi. Pe bye n dir yāā busāā, pe laam wāyāā.

12 Pe ba di, ma di yai. Yesu n u kānyārwai pye ma yee: «Dir rii pe di yaha, -ye te gbe, ngaa ma n kuee ye!»

13 Pe bye pe ba di yai wa, pe n te bur bua gber wāā gbe, ma sya takūyīhī sēnsye syāŋ yī.

14 Yesu tuu laanwo wī nde pye, pe nabuar n le yāā yīnde ne, pe n nii le pāā ma yee: «U Yāhā kaplāŋ tōrfua wii tuu ne yai u pa driyē wo, woo kē dya nwo ne!»

15 Yesu n cā pe ga ba u gbe fānga na, pe u ta pe fla kāntraha yīnfua. U n maha wloho yi pe laam wo, ma ga nii ke yāŋ yīŋ na u ya ya.

*Yesu yār ke langbāŋ loho na
(Mat 14.22-33; Mar 6.45-52)*

¹⁶ Loo kur ye, yai ke ba kua wa, Yesu kānyārwai n tege ga ke langbāŋ yě tǎy.

¹⁷ Pe n dugu dye salangbāŋ gaa laam wo, ma dii n gaha Kapornu kue ye. Yimper n ba wo, Yesu sē ba taha ga wa pe na ye.

¹⁸ Teflahangbāŋ gaa n yir, ma nii n fua, ma ke langbāŋ loho gblaha fānga ne.

¹⁹ Pe n ba fā ma- ke salangbāŋ ne, ke langbāŋ yīŋ na, ma sya dey. Pe n Yesu yāā, tuu yār n pai ke langbāŋ loho na, ke salangbāŋ kue ye. Pe n fya.

²⁰ Yesu n pe pye ma yee: «Ndoo kē, ye ma n fya ye!»

²¹ Pe n yee, poo ga u gbe ke salangbāŋ wo, ma yāā ke te kǎntraha na. Pe ba dye wa pe kasaha wo.

²² Ke yīŋsyii wo, pe nabuar mpāy pe ba kuee ke langbāŋ kūndi ngaa na, pe ba cā ma yee ke salangbāŋ neŋ gi ke pye, Yesu kānyārwai ba dugu dye ke wo pe ya ya, ma tēr. Yesu sē -sē ba dye pe ne ye.

²³ Salangbāy taa -sē ba yir klo laa wo pe n yee Tyiberyati, ma ba yer fla ngii na, Yesu ba syaha cāā wāā Yāhā kē te bur wī na, ma te la pe nabuar kē pe n di.

²⁴ Pe nabuar pe sē Yesu yāā u kānyārwai ne ye, pe n dugu dye too salangbāy nde wo, ma ka Kapornu wo Yesu taysaha wo.

Yesu ma mii digi gi syi dyan?

25 Loo kur ye, pe nabuar n ga Yesu yāã ke langbāŋ kūndi ngaa na, ma u pye ma yee: «Yīŋfua, ma pa nwo yaliile wo?»

26 Yesu n pe yē sya ma yee: «Ta n cīinde nde pāã ye ye: Ye bur yāã di ma sya di yai, koo kē ye n nii ra fla ke. Laanwo wūhū ngī tē n pye, le sē nii mii ye koo kē yīntaha war, koo kē ye n nii ra fla ke ye.

27 -Ye yāŋ, digi gii ke n klaha-, ye ma syi ye naa tēn tē koo wī na ye! Digi gii ke sē n klaha- ye, ma cīinde yrā wāã nawee kē, lii wākuayāã wee le na ye, -ye naa tēn tē koo wī na! Koo digi nge, u Nawee Puee kē u ga ba ke wāã ye kē. Ye sē yāã, Yāhā u lehe wāã loo wī na, ma loo fānga wāã u kē.»

28 Loo na, pe n u yey ma yee: «Kai- nkāy ke n tāy Yāhā ye, wo yar ke ne wo n naa ke pye.»

29 Yesu n pe yē sya ma yee: «Kai lii le n tāy Yāhā ye, ke n yee ye yai ye naa le pye, loo ne nde: Ke wii lehe wāã, -ye u ta ye Yater!»

30 Pe n u pye ma yee: «Ma ga waha kai lii pye laanwo wī, wo n yāã yīnde ne, wo ma ta wo Yater? Ma ga kai lii loo pye?

31 Wo faale wāle bii digi gaa di tēyāfūū klo wo, pe naa n yee man. Loo ne le yrūhū yaha Yāhā sabangbāŋ wo ma yee: «Ke yāhāyīŋ digi tege wāã pe kē pe n di.» »

32 Yesu n pe yē sya ma yee: «Ta n cīinde nde pāã ye ye: Musa sē kē tuu bii ke yāhāyīŋ digi wāã ye wāle kē faale wo ye, ta Tuhufua Yāhā bii kē. Ta Tuhufua Yāhā maha kē ke cīinde yāhāyīŋ digi wāã ye kē.

³³ Ye sê yãã, Yãhã digi gii wãã ke yir yãhãyĩŋ na, ma ba cĩĩnde yrã wãã driyẽfa kē.»

³⁴ Loo na, pe n u pye ma yee: «Yĩŋfua, naa koo digi nge wãã wo kē yalebyε.»

³⁵ Yesu n pe yar ma yee: «Ndoo tē ma koo digi nge, koo digi gii ke cĩĩnde yrã wãã nawee kē. Wii ma pa ra ye, fãã saa ufua yigi yãã ye; tesē wii ma ra ta u Yater, loho fãã saa ufua yigi yãã ye.

³⁶ N ye yar le ne, ye maha ra yãã, ye sē -sē ra ta ye Yater ye.

³⁷ Ta Tuhufua ke mpãy ta ra wãm, pe ga pa ra ye; tesē wii ma pa ra ye, n saa ufua sye ye.

³⁸ Ye sê yãã, n sê yir yãhãyĩŋ na, ma tege ba nii laam wĩ pyesaha wo ye; Yãhã gii ke ra lɛhɛ wãã, n pa koo laam wĩ pyesaha wo.

³⁹ Koo gii ke ra lɛhɛ wãã, ke laam wĩ le -sē ma lii ne, mpãy byε ke le soho ra koho wo, n ma syi poo nen waa n plaha ra ye ye, n ba pe byε ta pe n yir gbã wo, pe dur ba yrãŋ na, driyẽ plii kuaper na.

⁴⁰ Ta Tuhufua Yãhã laam wĩ le ma lii ne, wii woo ma ra yãã ma ra ta u Yater, u ga cĩĩnde yrã yãã, lii wãkuayãã wee le na ye. N ga ba ufua ta u n yir gbã wo, u dur ba yrãŋ na.»

⁴¹ Yesu tuu yee woo kē cĩĩnde digi gii ne ke yir yãhãyĩŋ na, ma tege ba, pe Yiiifee- n nii wlũhũ n pãã pe ya nsoho wo loo wĩ na.

⁴² Pe naa n yee: «Yosεfe dya Yesu sē na u ne? Wo byε u tuhufua cã u nahafua ne; u pye mii ma yee woo yir yãhãyĩŋ na, ma tege ba kãntraha na?»

⁴³ Yesu n pe yẽ sya ma yee: «Ye tee wlũhũ n pãã ye nsoho wo.

44 Waa saha pa ra ye mii ta Tuhufua Yâhã sê kē ke ufua yee ba ra kē ye, ta Tuhufua Yâhã gii ke ra lehe wãã. Ufua ma -sê pa ra ye, ndoo ga ba u ta u n yir gbã wo, u dur ba yrãṅ na, driyê plii kuaper na.

45 Faale Yâhã kaplãṅ tōrfa le yrũhũ yaha Yâhã sabangbãṅ wo ma yee, nawee- bye ga ba klahã Yâhã kaklahã ne. Wii ma luhu ta Tuhufua Yâhã ye, ma u kaklahã sya, ufua n pai ra ye.

46 Waa sê Tuhufua Yâhã yãã yãã ye, ma yi kãã wii na tuu yir Yâhã tãy ma pa, woo Tuhufua Yâhã yãã.

47 Ta n cĩnde nde pãã ye ye: Wii ma ra ta u Yater, ufua cĩnde yrã yãã wa, lii wãkuayãã wee le na ye.

48 Ndoo kē digi gii ne ke cĩnde yrã wãã nawee kē.

49 Ke yãhãyĩṅ digi gii pe naa n yee man, ye faale wãle n bii ke di tēyãfũũ klo wo, pe ba kuee la mii pe sê ku ye? Pe ba ku.

50 Cĩnde digi gii ke yir yãhãyĩṅ na, ma tege ba, koo kē nge; wii ma ke di, ufua saa ku yãã ye.

51 Ndoo kē ke cĩnde digi gii ne ke yir yãhãyĩṅ na, ma tege ba kãntraha na. Wii ma koo digi nge di, ufua ga kuee yai tãṅ yrãṅ na u kuãṅ ne, u saa ku yãã ye. Digi gii tē ga ba wãã, koo kē ta koho kadye ne; n ga ke wãã driyêfa n waha cĩnde yrã yãã, lii wãkuayãã wee le na ye.»

52 Loo nde na, pe Yiifee- n nii pe ya ke ma yee: «U ga waha u ya koho kadye wãã wo kē wo n di mii syi dyaṅ?»

53 Yesu n pe pye ma yee: «Ta n cĩnde nde pãã ye ye: Ye ma yee ye sê u Nawee Puee kadye di

ma u ntāŋ wɔ ye, cīinde yrā wee ye ye ye.

⁵⁴ Wii ma ra kadye di ma ra ntāŋ wɔ, ufua ma cīinde yrā ne, lii wākuayāã wee le na ye. N ga ba u ta u n yir gbā wo, u dur ba yrāŋ na, driyē plii kuaper.

⁵⁵ Ye sē yāã, ta kadye ma cīinde digi, ta ntāŋ ma cīinde lawoŋ.

⁵⁶ Wii ma ta kadye di ma ra ntāŋ wɔ, ufua ga nii loho saa naa n yi u nsoho wo ra ne ye, n -sē ga nii loho saa naa n yi ra nsoho wo u ne ye.

⁵⁷ Yrā kur bye n yi ta Tuhufua Yāhā ye, koo gii ke ra lehe wāã, n ma cīinde yrā ne koo kāmāy na. Ke syi, wii ma ra kadye di, ufua ga cīinde yrā yāã ra kāmāy na.

⁵⁸ Cīinde digi gii ke yir yāhāyīŋ na, ma tege ba kāntraha na, koo wīi kē tē n pāã ye ye. Ke wee mii faale digi nge dyaŋ pe naa n yee man ye. Ye faale wāle pe bii ke man di, pe sē kuee mii pe sē ku ye. Wii ma cīinde digi nge di, ufua ga kuee yai tāŋ yrāŋ na u kuāŋ ne.»

⁵⁹ Yesu naa nawee-klaha, ma naa kai-ngīi pāã pe ye Kapornu wo, Yiifee-yawāhā nwoŋ wo.

⁶⁰ Yesu tuu ba pāã wa, u kānyārwai busāã mpāy n yir ma yee: «Kaplāŋ ngīi waha ter, yoo ma u ga waha naa ke syi luhu?»

⁶¹ Yesu tuu le cā u laam wo, a pe ma pe wlūhū n pāã ke syi, u n pe pye ma yee: «Kaplāŋ ngīi ma la wāpee ye ye?»

⁶² Ah ye ma -sē ba u Nawee Puee yāã tuu dugu ga tuu pye na faale wo, ye ga pye mii?

⁶³ Yāhā Yrā Fānga ne le cīinde yrā wāã nawee kē; nawee ya dyaŋ, u saha laa pye u ya ya ye.

Kaplān nkāy tē pāā ye ye, Yāhā Yrā Fānga ma ke na, ke cīnde yrā wāā nawee kē.

⁶⁴ Mpāy -sē ma ye laam wo, pe sē ra ta pe Yater ye.» Ma gbe ke kai- fegbecāā na, mpāy pe sē Yesu ta pe Yater ye, u ba pe cā wa, poo tesē wii gε ne u ga ba woo Yesu yi u napīī- kē.

⁶⁵ U n maha pe pye ma yee: «Loo ne ta n ye yar ma yee, waa saha pa ra ye mii ta Tuhufua Yāhā sē loo ta ye.»

⁶⁶ Tuu loo pāā wa, u kānyārwei busāā n dur yi u kur ye, pe sē maha naa n taha u na nantān ye.

⁶⁷ Loo na, u n u kānyārwei sēnsye syām pye ma yee: «Ah yii, ye saa ter la ra yaha yii ndon?»

⁶⁸ Syimu Pyar n u yē sya ma yee: «Yīnfua, ma yee wo ka yoo woo ye? Mboo kaplān cīnde yrā wāā nawee kē, lii wākuayāā wee le na ye.

⁶⁹ Wo le sya cīnde, ma maha cā mboo kē u Crise, u Yāhā Yīndefua.»

⁷⁰ Yesu n pe yē sya ma yee: «Ye cā ndoo kē tē ye yān yi, yii sēnsye syām mii! Waa -sē ma ye laam wo, sāndūpee kē u ne!»

⁷¹ Syikaryotefa Syimu dya Yuda wīī ne u naa n pāā. Woo kē tuu ga ba Yesu yi u napīī- kē; u pye pe kānyārwei sēnsye syām mii waa.

7

Yesu cīifa sē u ta pe Yater ye

¹ Loo kur ye, Yesu naa n tay Galele kántraha kui wo. U sē naa n kε u naa n tay Yude kántraha kui wo ye; pe Yiifée- yahaseefa naa u wāboo wīī kε, koo kē.

² Yiifée- ngbaabir gbar pye, te yale ba gbe taha.

³ Yesu cīfa n u pye ma yee: «Yir, ma ka Yude kántraha wo. Ma kányārwai mpāy pe ma ke fla na, pe bya n waha ma yāā ma tēn na pe ya ndoŋ.

⁴ Wii ma n traha u myaha ke yi nawee- bye n u cā, ufua sē u kai- wūhū waa na ye. Ma'a ke syi kai- pye, ke pye naa n yar nawee- bye na mii ya.»

⁵ U cīfa bya sē ba u ta pe Yater ye, koo kē.

⁶ Yesu n pe pye ma yee: «Ta yale sē nɔ wa ye. Yii poo na, yalebye yai ye ye.

⁷ Ye wīi saha fūhū driyēfa ye ye; ndoo wīi fūhū pe ye, n pe yar n laha pe pyer sē yō ye, koo kē.

⁸ Yii poo na, -ye dugu ga te gbar na! Ndoo sē n gaha yagaa ye, ta yale sē nɔ wa ye, koo kē.»

⁹ Tuu koo pāā wa pe ye, u n kuee Galele kántraha wo.

Yesu ka te ngbaabir gbar na

¹⁰ Yesu cīfa pe ba dugu ga wa te gbar na, u bya n dugu ga; u sē -sē u ya yar nanihi wo ye, ma ta waa sē yi le cāŋ na ye.

¹¹ Yiifee- yahaseefa naa u ke te gbar na, ma naa le yey u ma na.

¹² Pe nabuar naa u wīi pāā. Mpāy naa n yee naweeyō kē u ne, mpāy -sē naa n yee, a u nawee- plaha n le kāmpee wo.

¹³ Nawee- -sē naa n fya pe Yiifee- yahaseefa na, pe sē waha naa Yesu wīi pāā pe laam ye.

¹⁴ Te gbar plii ba la cer wa, Yesu n dugu ga ke Yāhā kangbāŋ wo, ma ga nii nawee- klaha.

¹⁵ Le n pe Yiifee- yahaseefa fe gbe, pe n sya nii n yee, a u pye mii ma Yāhā sabangbāŋ wūhū cā, woo wii u sē klaha yāā waa ye ye.

16 Yesu n pe pye ma yee: «Tē nawee- klaha kainkāy ne, ta ya wūhū sē kē ye. Yāhā gi ke ra nō wāā, koo wūhū kē.

17 Wii ma yee u ga Yāhā laam wī pye, ufua ga cā, le ma pye Yāhā kaklaha tē n klaha; le ma pye ta ya wī ne tē n klaha, u ga maha le cā.

18 Wii tuu u ya wī pāā, u n ke u ya myaha ke gboho; wii u nō wāā, u ma nii u nōwāāfua myaha gboho, woofua cīinde pāā, u wī laa wee kawar wī ye, u wī laa wee le kāā ye.

19 Kānde lii Yāhā le ta, Musa le yar ye na; yii nawee nen waa ge sē -sē wee u le yār ye. Nwa ye n nii ra wāboo wī ke?»

20 Pe nabuar n u yē sya ma yee: «Sāndūpee ma ma yīn na. Yoo ma u ma wāboo wī ke?»

21 Yesu n pe yē sya ma yee: «N kai laa pye kani per wo, le n ye fe gbe.

22 Wākū nge gi faale wāle pe cāā yir le ne, kur ku ye, Musa bii le wāpye kānde ta ye n nii le pye. Ah ndee, wākū per gi ma sron kani per ne, ye ma ne le pye koo kani per wo?

23 Tee -sē wākū kū kani per na, ma yee loo sron Musa kānde na, ah nwa ta ye n nii ra ke yīntayāhā ne, ma yee n tee nawee ta u n jaa kani per wo?

24 Ye ma syi ye nawee sāhā kai ne ke dya, mii ye sē le kai war ye! Ye yai ye yān le le kai wo, -tee maha sron ye cā ufua sāhā!»

25 Yurusalemfa mpāy naa le pāā ma yee: «Wii wāboo wī pe n ke, woo sē na nwo?

26 U nwo u nii n pāā pra, pe sē maha laa ge pāā u ne ye! Pe yahaseefa ga pye pe le yān cā cīinde ma yee, woo kē u Yāhā Yīndefua Crise ne.

27 Wo -sē dya nwo woo yisaha cā; Crise woo -sē na, woo ma ba pa, waa saa ba u yisaha cā ye.»

28 Yesu pye pe nawee- wāklaha na ke Yāhā kangbāŋ wo, u n tē sya ma yee: «Ye yee ye ra cā, ma maha ra yisaha cā! N sē pa nii ya wāpaŋ na ye. Koo gii ke -sē ra nō wāā, cīnde na ke ma; ye sē ke cā ye.

29 Ndoo ke cā, n yir koo fla na, koo maha kē ke ra nō wāā.»

30 Pe n nii u yigisaha ke, waa sē -sē koho taha u na ye; u yale sē ba nō wa ye, koo kē.

31 Pe nabuar mpāy n u ta pe Yater, ma nii le pāā ma yee, a u Crise ma ba pa, u ga ba laanwo wūhū pye la u ta ter nwo yaha?

32 Pe nabuar pe naa kai- ngī wlūhū naa n pāā Yesu wī na, pe Farisyē n ke luhu. Loo na, pe Yāhā yūndefa yīŋfa n yir pe Farisyē ne, ma Yāhā kangbāŋ sēŋfa nō wāā pe ba Yesu yigi.

33 Yesu tuu yāā ke syi, u naa mpāy klaha, u n pe yar ma yee: «N ga faa kuee ye ne n ba yalaa dye, tē ba ter kii fla na ke ra nō wāā.

34 Ye ga ba naa ra ke, ye sē -sē ga ba ra yāā ye. Tē ga ba pye fla ngii na, ye saha ka ke fla na ye.»

35 Pe Yiifēe- yahaseefa pe loo luhu, pe n nii pe ya yey ma yee: «U ga ba ka na, wo saa ba u yāā ye? Yiifēe- mpāy pe cāāŋ ma ga nii Jrekefa fla na, u ga ba ka la poo fla na, u ga naa pe klaha?

36 U maha le pāā ma yee, too ga ba naa woo ke, wo sē -sē ga ba u yāā ye, tuu ga ba pye fla ngii na, wo saha ka ke fla na ye. Koo kaplāŋ ngī yīntaha kē lii ne?»

Loho gii ke cīnde yrā wāā nawee kē

³⁷ Te gbar kuaper, koo gii ke ma te gbar perngbãñ, Yesu n yir yer pe nawee- telai wo, ma tẽ sya ma yee: «Loho fãã ma wii yigi, u pa ra ye u ba wo.

³⁸ Wii ma ra ta u Yater, loho gii ke cĩnde yrã wãã nawee kẽ, ke ga ba fã naa n dye ufua laam wo, mii le ma le yrũhũ yaha Yãhã sabangbãñ wo mii.»

³⁹ Yãhã Yrã Fãnga ne Yesu u naa n yãñ, loo lii mpãy pe ba u ta pe Yater, pe ne ga ba le yãã, pe sẽ -sẽ ba le yãã wa ye. Loo yale wo, le Yãhã Yrã Fãnga sẽ ba kẽ wa ye. Yãhã sẽ ba Yesu miingbãñ ta ke n yi wa ye, koo kẽ.

Nawee- kaplãñ pye ke ya wuhu na Yesu wĩ na

⁴⁰ Pe nabuar pe ba Yesu kaplãñ luhu, mpãy naa n yee, a Yãhã kaplãñ tãrfua kẽ u ne cĩnde.

⁴¹ Mpãy naa n yee, a u Yãhã Yĩndefua Crise kẽ u ne. Mpãy naa n yee: «U Crise yai la u yi Galele kãntraha wo cĩnde?

⁴² Le sẽ yrũhũ yaha la Yãhã sabangbãñ wo, a u Crise ga ba nii wo faale yĩnfua Dawide kur kue puee waa, u yi klo nde wo pe n yee Betelemu, Dawide u pye na?»

⁴³ Pe nabuar kaplãñ n nii ke ya wuhu na Yesu wĩ na.

⁴⁴ Mpãy n yee poo ga u yigi; waa sẽ -sẽ koho taha u na ye.

⁴⁵ Pe Yãhã yĩndefa yĩnfa, tesẽ pe Farisyẽ ne, pe ba Yãhã kangbãñ sɛnfa mpãy nɔ wãã pe ga Yesu yigi. Pe n dur ba pe fla na kãnwai ne, pe n pe yey nwa ta pe sẽ u Yesu yigi ba ye.

⁴⁶ Pe n pe yẽ sya ma yee, poo sẽ waa yãã yãã tuu n pãã Yesu wãñ syi dyañ ye.

47 Pe Farisyẽ n pe pye ma yee: «Ye bya yãã u kaplãn luhu u n ye yĩy wã klaha?

48 Yahaseefua waa yãã u ta u Yater laa, Farisyẽ naa waa?

49 Nabuar nde, te sê Yãhã kãnde cã ye, yoosën ma pe na!»

50 Nikodemu wii tuu ba yir yĩmper wo, ma ka Yesu fla na, u pye pe Yiifee- yahaseefa nen waa. U n pe pye ma yee:

51 «Wo kãnde na, pe ga waha wãpën ta la nawee na, mii pe sê cã u lii pye ye, mii pe sê maha u yẽ yor luhu ye?»

52 Pe n u pye ma yee: «Ma bya ma la Galelefa naa? Ma'a le yãŋ Yãhã sabangbãŋ wo, maa yãã Yãhã kaplãn tórfua sê yi yãã Galele kãntraha na ye.»

Cɔɔ wii u naa waa di

[
53 Loo kur ye, nawee- bye n ter pe kle wo,

8

1 Yesu n -sê ka wolifye yãŋ yĩŋ na. Katyir raa ter pye ke fla na, pe naa te yee wolifye katyir.

2 Ke yĩŋsyii wo, sukũhũntãy na, u n maha dur ga ke Yãhã kangbãŋ wo, nawee- bye n pe ya wãã ba u fla na. U n tege nii, ma nii pe klaha.

3 Pe Yãhã kaiyarfa, tesê pe Farisyẽ ne, pe n pa cɔɔ waa ne, pe ba u tã yigi naa ne. Pe n u cɔɔ le pe nabuar telai wo,

4 ma Yesu pye ma yee: «Yĩŋfua, wo cɔɔ nwo tã yigi naa ne.

5 Musa kãnde na le yee, cɔɔ nwo syi yai pe u waa boo ntẽmbar ne. Ah mboo -sê yee mii?»

6 Pe naa n ke pe u le namihi wo, u ma plaha pãã, pe waha yee u tee pye. Yesu ba yĩŋ kor le, ma naa n yrũhũ kõnde ne kãntraha na.

7 Pe kuee naa u yĩntaha war ke kayey ne, u n ba yĩŋ kuã yir, ma pe pye ma yee: «Ye laam wo, wii ma pye kapee laa wee u yĩŋ na ye, u cãã u cɔɔ waa yãŋ ntẽmlaha ne.»

8 U n maha yĩŋ kor le, ma nii n yrũhũ kãntraha na.

9 Pe nawee- pe kaplãŋ ngĩ luhu, laam sã sya pe ye ye, pe n nii n ter nanem nanem, ma cãã gbe pe wãle na, ma sya ga kua. U cɔɔ ya n ba kuee Yesu ne, cɔɔ wii pe ba le telai wo.

10 Yesu n ba yĩŋ kuã yir loo na, ma u cɔɔ ya yãã, ma u pye ma yee: «Cɔɔ, mpãy pe le kai nde pãã taha ma na, pe ma na? Waa sã ngaa pye la ma na?»

11 U cɔɔ n yee: «Aye, Yĩŋfua.» Yesu n u pye ma yee: «Ta bya, n saa laa pye ma na ye; ka, ma'a syi ma kapee pye nantãŋ ye!»]

Yoo u cãã- le driyẽ wo?

12 Loo kur ye, Yesu n maha te nabuar pye ma yee: «Ndoo tẽ ma cãã- driyẽ wo. Wii ma n taha ra na, u saa naa n yãr wam wo ye, ufua ga cãã- yãã, cãã- mpãy pe cĩnde yrã wãã nawee kã.»

13 Pe Farisyẽ n u pye ma yee: «Ma ya wĩ ne raa n pãã mii ya; ma kapãn saha nii cĩnde ye.»

14 Yesu n pe yẽ sya ma yee: «Tẽ sya nii wĩ pãã nii ya, ta kapãn ma cĩnde; ye sã yãã, n ta yisaha cã, ma maha ra kasaha cã; yii sã -sã ra yisaha cã ye, ye sã maha ra kasaha cã ye.

15 Ye nawee sãhã ke dyan ye laam wũhũ ya ne. Ndoo sã wee tẽ waa sãhã ye.

16 N ma sya waa sãhã, ta kaplãŋ ma cĩinde, ndoo ya yẽ kaplãŋ sã kã ye; ta Tuhufua Yãhã gii ke ra nɔ wãã, ke ma ra ne.

17 Ye wãɛ kãnde na, le ma le yrũhũ yaha ma yee, nawee- syãm yẽ kaplãŋ ma pye wãceŋ, pe kapãn ma cĩinde.

18 N ta wĩ pãã nii ya, ta Tuhufua Yãhã gii ke ra nɔ wãã, ke bya maha ra wĩ pãã.»

19 Loo na, pe n u pye ma yee: «Ma Tuhufua ma na?» U n pe yẽ sya ma yee: «Ye sã ra cã ye, ye sã ra Tuhufua bya cã ye. Ye ma ne pye ye ra cã, yaa ne ra Tuhufua bya cã.»

20 Yesu pye Yãhã kangbãŋ wo, war lesaha fla tãy, ma naa ke kaplãŋ pãã. Waa gɛ sã koho taha u na ma yee u ga u yigi ye. U yale sã ba nɔ wa ye, koo kã.

Yesu driyẽfa yar yaha pe wĩ ne

21 Yesu n maha pe yar ma yee: «N ga ba tɛr. Ye ga ba naa ra kɛ, ye sã -sã ga ba ra yãã ye. Ye ga ba ku ye kapee- koho wo. Tã ga ba ka fla ngii na, ye saha ka ke fla na ye.»

22 Pe Yiifee- yahaseefa n yee: «Tuu yee woo ga ba ka fla ngii na, wii saha ka ke fla na ye, ah u yãã ga u ya boo, ma n pãã ke syi?»

23 Yesu n pe pye ma yee: «Kãntraha nge nawee- me ye ne, ndoo -sã yi yãhãyĩŋ na. Driyẽ nge nawee- me ye ne, ndoo sã -sã yi driyẽ nge wo ye.

24 Loo ne, ta n ye pye ma yee, yaa ku ye kapee- koho wo. Tã ma ngii, ye ma yee ye sã loo sya cĩinde ma ra ta ye Yater ye, ye ga ku ye kapee- koho wo.»

25 Pe n u yey ma yee: «Nwa kē ma ne?» Yesu n pe yē sya ma yee: «Tē cāã lii pãã ye ye, loo ne.

26 Kai- busãã ma tē ga pãã ye wĩĩ na, tesē kai- busãã ne tē ga sãhã ye wĩĩ na; wii tuu -sē ra nɔ wãã, u wĩĩ ma cĩĩnde; tē lii luhu u ye, loo ne tē n pãã driyēfa ye.»

27 Pe sē ba cã ma yee u Tuhufua Yãhã wĩĩ ne u n pãã pe ye ye.

28 Yesu n pe pye loo na ma yee: «Ye ma ba ndoo u Nawee Puee kuã yir ta, yaa cã cã n ma ngii. Ye ga maha cã, ta ya wũhũ sē kē tē n pye ye. Ta Tuhufua Yãhã ke ra klaha kai- nkãy ne, koo kē tē n pãã ye ye.

29 Koo gii ke ra nɔ wãã, ke ma ra ne. Ke sē ra ta yaha nii ya ye, lii le n tãy ke ye, n loo pye yalebye, koo kē.»

30 Yesu tuu koo kaplãŋ pãã ke syi, nawee- busãã n u ta pe Yater.

Mpãy pe ma kapee- wãpyeŋ yãmpa

31 Yiiffee- mpãy pe ba Yesu wĩĩ sya cĩĩnde, u n pe pye ma yee: «Ye ma ra kapãn le yaha ye laam wo, ye ma ra kãnyãrwai cĩĩnde.

32 Ye ga ba le cĩĩnde wĩĩ cã, le n ye yi kãã yãmpar wo.»

33 Pe n u yē sya ma yee: «Wo faale Brama kur me wo ne, wo sē nii yãã waa yãmpa ye; ma -sē maha pye mii ma yee, wo n pai yi kãã yãmpar wo?»

34 Yesu n pe yē sya ma yee: «Ta n cĩĩnde nde pãã ye ye: Wii u kapee- pye, u ma kapee- wãpyeŋ yãmpuai.

³⁵ Yâmpuai sê kuee yai n tãŋ u yĩŋfua kaha na ye. U yĩŋfua dya woo na, woo kuee yai n tãŋ ke kaha wo u kuãŋ ne.

³⁶ U Yâhã Dya ma ye yi kãã kapee- wãpyeŋ yãmpar wo, ye ga tefay yãã ye kuãŋ ne.

³⁷ N cã ma yee Brama kur kuε pii me ye ne; ye -sê ra wãboo wĩ ke, ta kaplãŋ sê n tãy ye ye ye, koo kē.

³⁸ Tê lii yãã ra Tuhufua Yâhã ye, loo ne tē n pãã. Yii, tee -sê lii luhu ye tuhufua ye, loo ne tee n pye.»

³⁹ Pe n Yesu pye ma yee, poo tuhufua kē Brama ne. Yesu n pe pye ma yee: «Ye ma ne pye Brama pii, tuu naa kai- nkây pye, ye ne ga naa koo pye.

⁴⁰ Yagaa, ye mii ye ndoo wãboo wĩ ke, ndoo wii tē le cĩnde pãã ye ye, cĩnde lii tē luhu Yâhã ye. Ye wĩ nde, Brama sê loo pye ye rεhε.

⁴¹ Ye tuhufua wĩ ne tee n pye.»

Pe n u pye ma yee, tããndya pii sê me poo ne ye, a tuhufua nen ya u ma poo ye, woo kē Yâhã ne.

⁴² Yesu n pe pye ma yee: «Yâhã ma ne pye ye Tuhufua, ta ntãŋ ne ga dye ye tãy. Ye sê yãã, n yi Yâhã fla na, koo fla kē tē yir, ma pa. N sê pa nii ya wĩ na ye, koo ke ra nɔ wãã.

⁴³ Nwa ta ye sê ra kaplãŋ war ye? Ke wãluhu laam wee ye na ye, koo kē.

⁴⁴ Ye tuhufua kē sãndãpee yĩŋfua Setane ne. Ye n ke ye naa ye tuhufua laam wĩ pye. U yir u nabor ne ke kai- fegbecãã na, u sê tãhã n yer cĩnde fla na ye. Woo gε, u wĩ laa wee cĩnde ye. Kawar wãfua koo ke ma woo tēn. Ye sê yãã, u ma kawarfuafua, ma maha ma kawar tuhufua.

45 Ndoo wii tē -sē cīinde pāã ye ye, ye sē ra wīi sya cīinde ye.

46 Ye laam wo, yoo ma u ga waha yee n kapee pye? Tē cīinde pāã ye ye, nwa ta ye sē ra wīi sya cīinde ye?

47 Wii u ma Yāhã wūũ, ufua ke kaplāŋ luhu; yii sē n luhu ke ye ye, ye wee ke wām ye, koo kē.»

Yesu cāã pye wa Brama yaha

48 Pe Yiifee- yahaseefa n u pye ma yee: «Wo tāhã sē na, too ne yee Syamarifa naa kē ma ne, ma maha n yee, a sāndūpee ma ma yīŋ na?»

49 Yesu n pe pye ma yee: «Ngaa sāndūpee wee ra yīŋ na ye. N ta Tuhufua Yāhã miingbāŋ gboho, ye -sē ra tyɛɛ.

50 N sē n ke ra myaha ke yi ye; waa -sē ma u n ke ra myaha ke yi, u kasāhã ma nawee- na.

51 Ta n cīinde nde pāã ye ye: Wii ma ra kapān sya, ufua saa ku yāã ye.»

52 Pe Yiifee- n u pye ma yee: «Yagaa taa nde pāã, wo cā sāndūpee ma ma yīŋ na. Wo faale wādyaha Brama ku, pe faale Yāhã kaplāŋ tōrfa byɛ ku; mboo -sē yee, a wii ma mboo kapān sya, ufua saa ku yāã ye.

53 Wo wādyaha Brama wii tuu ku, ma tɛr la u yaha? Pe Yāhã kaplāŋ tōrfa gɛ, pe byɛ sē ku la? Mboo -sē mii ta nwasyifua?»

54 Yesu n pe yē sya ma yee: «N ma pye n nii myaha sey nii ya, koo wee ngaa ye. Ta Tuhufua Yāhã kē ke ra myaha sey, koo gii tee ne yee ke ma ye Yāhã,

⁵⁵ ye sē maha ke cā ye. Ndoos ke cā; n ma yee n sē ke cā ye, n ga nii kawarfuafua ye wāŋ syi dyaŋ. N ke cā, n ke kaplāŋ le n yaha ra laam wo.

⁵⁶ Wo wādyaha Brama cāā cā, u ga ba ra wāpaŋ yāā; le n tāy u ye. U n -sē ba ke yāā, ma sya nuhu di le na.»

⁵⁷ Pe n u pye ma yee: «Ma sē dyε- gbeesī sēnsye gε yāā wa ye, ma -sē yee, a mboo wo faale Brama yāā!»

⁵⁸ Yesu n pe pye ma yee: «Ta n cīinde nde pāā ye ye: Brama sē bii see wa ye, ndoo -sē cāā pye wa.»

⁵⁹ Pe Yīifee- pe nde luhu, pe n yee poo ga u waa ntēambar ne. Yesu n plaha pe na ke Yāhā kangbāŋ wo, ma yi ter.

9

Yesu fūū naa waa jaa

¹ Per gaa, Yesu naa n ter, ma ba fūū naa waa yāā. U ba see ke dyaŋ.

² Yesu kānyārwai n Yesu yey ma yee: «Yīŋfua, fūū naa nwo tuu see ke syi, yoo kapee wāpyeŋ kē le ta loo nde n u dye? Woo tuu kapee pye, laa u seefa?»

³ Yesu n pe yē sya ma yee: «Le sē nii mii u kapee pye, laa na u seefa ye. U see ke syi, Yāhā ga laa pye u na, nawee- byε n le yāā yīnde ne, pe ke miingbāŋ gbobo.

⁴ Koo gii ke ra nō wāā, n yai n ke tēn tē yagaa, yai ke sē kua wa ye. Yīmper ma ke ga ba wo. Waa wee u tēn tē yīmper wo ye.

⁵ Tē nwo driyē laam wo, n ma cāā- driyēfa ye.»

⁶ Yesu tuu koo pãã wa, u n yěsyõr tu kãntraha na, ma poor tũhũ, ma te pye ta u fũũ naa yĩmpɛ na,

⁷ ma u pye ma yee: «Ka, maa ma yĩntaha yee loho nge wo pe n yee Syilwee.» Ke Syilwee yĩntaha kē: Wii pe u nɔ wãã. U fũũ n ka, maa u yĩntaha yee ke wo. Tuu dur ga kaha wo, u naa n yãŋ.

⁸ U kasohofa, ma suhu mpãy ne pe ba u cã, ma cã u naa n nar, pe u yãã pe n nii n yee: «Wii u ba tege nii naa nawee- nar, woo sē na?»

⁹ Mpãy naa n yee woo kē, mpãy -sē naa n yee, a u tayfua kē. Woo -sē naa pe yar ma yee woo kē.

¹⁰ Pe n u yey loo na ma yee: «Ma yĩmpɛ pye mii ma jaa ma ye, ma n waha n yãŋ?»

¹¹ U n pe yě sya ma yee: «Dya wii pe n yee Yesu, woo u poor pye ta ra yĩmpɛ na, ma ra pye n ga ra yĩntaha yee loho nge na pe n yee Syilwee. Ta n ka, maa ra yĩntaha yee, ma yãã n waha n yãŋ.»

¹² Pe n u yey ma yee, u dya ma na. U n yee woo cã na.

¹³ Dya wii tuu pye fũũ, pe n ka u ne Farisyẽ ye fla na.

¹⁴ Kanii per -sē ba kē Yesu tuu ba te poor ta, ma u yĩmpɛ jaa u kē.

¹⁵ Pe Farisyẽ n maha u yey ma yee, u pye mii ma waha jaa, ma n yãŋ. U n pe pye ma yee: «U poor pye ta ra yĩmpɛ na, ta n ga ra yĩntaha yee, ma yãã n n yãŋ.»

¹⁶ Loo na, Farisyẽ mpãy n le pãã ma yee, Yãhã sē kē ke dya nwo nɔ wãã ye, a u ke kanii per kapĩĩ

wĩ pye n klaha-. Mpāy n -sē yee, a kapeepyefua ga waha laanwo wũhũ ngĩ syi pye mii? Pe yě kaplāṅ n nii ke ya wuhu na.

¹⁷ U dya wii tuu pye fũũ, pe n maha u yey ma yee: «U dya wii tuu ma yĩmpε jaa ma kē, mboo yee nwasyifua kē u ne?» U n pe yě sya ma yee: «Yāhā kaplāṅ tōrfua kē u ne.»

¹⁸ Pe sē le sya cĩinde ma yee u pye fũũ, ma ba jaa ma waha n yāṅ ye; pe n sya ta pe n u seefa yee ba.

¹⁹ Pe n pe yey ma yee: «Ye dya wii tee yee u see fũũ, woo la nwo? Ah u pye mii ma waha n yāṅ yagaa?»

²⁰ U dya seefa n pe yě sya ma yee: «Wo cā wo dya kē u ne, u see fũũ.»

²¹ Tuu -sē pye mii ma waha n yāṅ yagaa, tesē yoo tuu u jaa, loo too sē cā ye. -Ye woo gε yey, kicar sē kē u ne ye, u ga waha u ya yĩṅ wĩ pāā.»

²² U seefa naa n fya pe Yiiffee- yahaseefa na, koo kē pe n ba pāā ke syi. Pe Yiiffee- yahaseefa ba le pāā ta wa ma yee, wii ma yee Yesu kē u Yāhā Yĩndefua Crise ne, ufua saa naa n dye pe Yiiffee- yawāhā nwoṅ wo nantāṅ ye.

²³ Koo kē u dya seefa n ba yee pe u dya gε yey, a kicar sē kē u ne ye.

²⁴ U dya wii tuu pye fũũ, pe Farisyē n u yey ke tε syāṅ wuhu na ma yee: «Yāhā yāṅ, ma cĩinde pāā. Wo cā kapeepyefua kē dya nwo ne.»

²⁵ U n pe yě sya ma yee: «U ma pye kapeepye-fua, n sē waha loo cā ye. Lii ya tē cā, n pye fũũ, yagaa n n yāṅ.»

26 Pe n u pye ma yee, Yesu u pye mii, u u yĩmpɛ jaa mii?

27 U n pe yě sya ma yee: «N le pãã wa ye ye, ye sê ra kapãn luhu la? Ye yee yaa maha le luhu ye nwa pye? Ye n traha la ye nii u kãnyãrwai?»

28 Pe n u tyɛɛ, ma dur ma u pye ma yee: «Mboo kě raa ma u kãnyãrwɛ, wii ma wo faale wãdyaha Musa kãnyãrwai.

29 Wo cã Yãhã bii pãã Musa ne; nwo woo na, wo sê u yisaha cã ye.»

30 U dya n pe yě sya ma yee: «Tee yee ye sê u yisaha cã ye, le yě gbãã ra na; woo -sê kě u ta ra yĩmpɛ n jaa.

31 Mpãy pe ma kapee- wãpyɛŋ wo, wo cã Yãhã wee ke n luhu poo wãnar ye ye. Wii tuu -sê ke myaha gboho, ma ke laam wũhũ pye, ke n luhu woofua wãnar ye.

32 Ma gbe driyě wãtãhã na, waa sê le luhu yãã pe yee waa fũũ yĩmpɛ jaa yãã ye, wii syi u see fũũ.

33 Ke ma ne pye Yãhã sê kě ke dya nwo nɔ wãã ye, u saa ne waha laa gɛ pye ye.»

34 Pe n u pye ma yee: «Ma see yi tãŋ kapee- wãpyɛŋ wo, yoo raa yee maa klaha?» Pe n u tã pe Yiifɛe- yawãhã nwoŋ wãdyɛŋ na.

Mpãy me pe ma fũũ- Yãhã kãnde na

35 Yesu n u dya wãkar wĩ luhu, u n u yãã, maa u pye ma yee: «Ma u Nawee Puee ta la ma Yater?»

36 U n u yě sya ma yee: «Yĩŋfua, yoo kě u ne? U yar ra na, ra n u ta ra Yater.»

³⁷ Yesu n u pye ma yee: «Ma u yãã; woo ge kē tuu n pãã ma ne yagaa.»

³⁸ U dya n kãnkũy gbãã Yesu yaha ye, ma u pye ma yee: «Yĩnfua, n ma ta ra Yater.»

³⁹ Loo kur ye, Yesu n yee: «N pa driyẽ wo, n n pai kasãhã raa yĩntaha yi, n ta, mpãy pe sē n yãñ ye, pe waha naa n yãñ; tesē, mpãy pe yee poo n yãñ, pe nii fũũ- wãñ syi.»

⁴⁰ Farisyẽ mpãy pe pye u ne, pe kaplãñ ngĩ luhu, pe n u pye ma yee: «Wo bya ma la fũũ- wãñ syi?»

⁴¹ Yesu n pe pye ma yee: «Ye ma ne pye fũũ- wãñ syi dyañ, kapee saa ne pye ye yĩñ na ye; tee -sē yee yii n yãñ, ye kapee- ga kuee ye yĩñ na.»

10

U mbanaha u mbaa ne

¹ Loo kur ye, Yesu n maha kaplãñ kuã cra pãã pe nawee- ye ma yee: «Ta n cĩĩnde nde pãã ye ye: Wii ma yee u sē dye mbaa naklaha yẽ ne ye, ma teele laa yãñ ke kãnkãy na ma dugu dye, yuhu naboofua kē woosyifua nwo ne.

² Ma -sē yee wii woo na tuu n dye ke mbaa naklaha yẽ ne, u mbanaha kē woo ne.

³ Yuhu- sēñfua pe mbaa na, u n sya ma ke naklaha yẽ yãr u mbanaha kē. Pe mbaa bye, pe n sya ma n luhu u ye. U myaha taha pe mbaa bye na, ma pe yee te ne, pe n yi n taha u na nkur ye.

⁴ U ma ta u mbaa bye n yi taha tãñ wa u na nkur ye, pe mii pe u yĩmbui cã wa, u ga naa n yãr pe yahasee ye, pe n naa n taha u na.

⁵ Pe saa sya pe taha naweete na ye, wii pe sê cã ye. Pe sê woo yĩmbui cã ye, pe ga fã dey u na.»

⁶ Yesu tuu kakuãcran nde tõi pe nawee- ye, pe sê laa gε war le wĩ na u ne ye.

Yesu woo tuu ma ke naklaha yě

⁷ Yesu n maha yee: «Ta n cĩinde nde pãã ye ye: Ndoo tẽ ma pe mbaa naklaha yě.

⁸ Mpãy byε pe cãã pa ra yaha, pe pye yuhu-naboofa. Pe mbaa sê -sê naa n luhu pe ye ye.

⁹ Ndoo kê ke naklaha yě. Wii ma ra ta u Yater, ma dye ra kuε koho ye, u yĩŋ pahasaha yãã. U ga waha naa n dye u laam, tuu dur naa n yi, tuu naa u digi yãã.

¹⁰ Yuhu woo n pai wãyuhu troho ne, wãboo yĩmbui ne, kaklaha- koho ne. Ma -sê yee ndoo woo na, n pa ma yee, mpãy byε pe ga naa n dye ra kuε koho ye, n ga cĩinde yrã wãã pe kê; tesê, ngaa saa kε laa pe ye ye.»

Yesu woo tuu ma u mbanahayõ

¹¹ Yesu n maha yee: «Ndoo tẽ ma u mbanahayõ. U mbanahayõ u mbaa gbã ku.

¹² Tëntële ma pye mbaa na, u tẽn tẽ wale myaha na. Woo sê -sê kê u mbanaha ye; woo sê kê u mbaafua ye. U ma waygapyãhã yãã, ke n pai pe mbaa ye, u ga fã ter pe yaha, ke n ba dye yigi pe laam wo, ke pe ta pe n fã cãñ.

¹³ Lii le ma ne usyifua ta u n le pye ke syi, wale wĩ ya le ma ne pye u na, u kalaa sê ma ne pye pe mbaa poo na ye.

¹⁴ Ndoo kê u mbanahayõ. N ta mbaa wĩ cã, pe bya ra wĩ cã.

15 Ta Tuhufua Yâhã ke ra wĩĩ cã mii syi dyaŋ, ta n -sẽ u wĩĩ cã mii, n ma ke syi ra mbaa ne. N ga pe gbã ku.

16 Mbaa mpãy maha ma ra ye. Poo ter wee naklaha nge wo ye. N yai n ga pe bya kuar ba le taha, n ba naa n naha. Pe ga ba naa ra yĩmbui luhu. Pe bye ga ba wãã le, pe nii naklaha nen, mbanaha nen ne.

17 Ta ntãŋ dye ra Tuhufua Yâhã tãy. N yer ta yrã wãwãã wĩĩ na, n ku, tẽ ba dur, n maha le sya. Loo ne, ta ntãŋ n dye ta Tuhufua Yâhã tãy.

18 Nawee waa sã kã tuu ga waha ta yrã sya ra ye ye. Le tãy ra ye, koo kã n ga le wãã, n ku. Le wãwãã fãnga ma ra ye, le wãsyã fãnga ne. Ta Tuhufua Yâhã ke ra taha lii na, loo kã loo nde ne.»

19 Yesu kaplãŋ n maha ta, Yiifee- n nii n pãã wuhu na creŋcreŋ.

20 Poo busãã naa n yee: «Sãndũpee waa u yĩŋ wũhũ wlãhã, u n sron cõŋ. Waa ma n ndityuhu yaha u ye ye.»

21 Mpãy, ma -sẽ naa n yee: «Sãndũpeefua kaplãŋ sã kã ngĩ ye. Nawee wii sãndũpee ma u yĩŋ na, u ga waha fũũ yĩmpe yãr la u kã, u n waha naa n yãŋ?»

Yiifee- yahaseefa Yesu wĩĩ sye

22 Pe ba naa ke Yâhã kangbãŋ wãfãã gbar gbar, dyadye wãŋ syi dyaŋ, Yurusalem wo. Le pye wer cãã.

23 Yesu -sẽ pye, u naa n tay ke Yâhã kangbãŋ wo, ntẽmbar laankongbãŋ gaa flãhã tãy, pe naa ke yee Salmuu laankõŋ.

24 Pe Yiifee- yahaseefa n pa, ma ba u gbey le, ma u pye ma yee: «Le ma pye mboo kē u Yāhā Yīndefua Crise ne, le pāā laha wo ye. Ma sē yāā, ma wo ta wo n nii laalaa pye n ter ma wīī na.»

25 Yesu n pe yē sya ma yee: «N le pāā wa ye ye, ye sē -sē ra wīī sya cīinde ye. Ta Tuhufua Yāhā kai- ngīī wāpyeŋ kānde wāā ra kē; loo nde ge ra wīī pāā n laha ye ye.

26 Ye sē -sē ra wīī sya cīinde ye; ye wee ra mbaa ye, koo kē.

27 Ta mbaa ra yīmbui luhu. Ndoos pe cā, pe n taha ra na.

28 N cīinde yrā wāā pe kē, lii wākuayāā wee le na ye. Pe wīī saa klaha- yāā ye, waa saha pe tyīn sya ra koho wo ye.

29 Ta Tuhufua Yāhā gii ke pe le soho ra koho wo, koo kē ke ma fānga bye yīn na, waa saha pe tyīn sya ke koho wo ye.

30 Ndoos, tesē ra Tuhufua Yāhā ne, wo ma nen.»

31 Loo na, pe Yiifee- yahaseefa n maha yee poo ga u waa ntēmbar ne.

32 Yesu n pe pye ma yee: «N kayūhū busāā pye yar ye na, ta Tuhufua Yāhā kāmāy na. Ye yee yaa ra waa ntēmbar ne koo kayūhū ngīī lii loo wīī na?»

33 Pe n u yē sya ma yee: «Wo sē yee waa ma waa ntēmbar ne kayīī laa wīī na ye, wo yee ma n gbar Yāhā ne, koo kē; taa ma nawee, ma sē yai ma yee ma ma Yāhā ye.»

34 Yesu n pe yē sya ma yee: «Yāhā sabangbāŋ wo, le ma le yrūhū yaha ma yee, Yāhā yee: <Ye ma Yāhā pii.>

35 Wo cā Yāhā sabangbāŋ ma lii pāā, le saha kuā kāā ye. Le Yāhā kapān le pāā wāā nawee-mpāy kē koo fla na, Yāhā yee pe ma Yāhā pii.

36 Yāhā ma -sē yee pe ma Yāhā pii, ndoo wii Yāhā ra yāŋ yi, ma ra nō wāā driyē wo, ye pye mii ma yee n n gbar Yāhā ne, a n tee yee n ma Yāhā Dya?

37 Le ma pye ra Tuhufua Yāhā kai- sē kē tē n pye ye, ye ma syi ye ra kaplāŋ sya cīinde ye.

38 N ma -sē ke pye, ye ma sya yee ye saa ra kaplāŋ sya cīinde ye, tē -sē kai- nkāy pye, -ye koo sya cīinde! Loo na, ye ga le cā laha ye yee, ndoo tesē ta Tuhufua Yāhā ne, loho sē n yi wo nsoho wo ye.»

39 Pe n maha yee, poo ga u yigi, u n wloho yi pe laam wo ma tēr.

40 Loo kur ye, Yesu n ka maa kuee Yurdane lafen kūndi ngaa ye. Koo fla kē Nsān tuu cāā ye, ma ba naa nawee- tāā naa n yi loho wo.

41 Nabuar n pa Yesu fla na, ma ba nii le pāā pe ya ye ma yee: «Nsān sē ba laanwo wīī laa pye ye, tuu -sē ba kai- nkāy byε cāā pāā yaha dya nwo wīī na, ke byε nii cīinde.»

42 Nawee- busāā n Yesu ta pe Yater ke fla na.

11

Yesu gbā yia

1 Yan ba dya waa yigi, u myaha Laasar. U pye klo laa wo pe naa n yee Gbetane. U syafa pye ke fla na, Maari ma suhu u lɛfua Marti ne.

² Woo Maari nwo kē tuu ba lasekole woo Yesu na, ma u yīnyor ta ma Yesu trε kluā u kē. Woo laŋ Laasar kē tuu pye yanfua.

³ U syafa n lεhε wāã, pe ga Yesu yar u naambiyābua wee wāwee ye.

⁴ Yesu tuu le luhu, u n yee: «Laasar yan nde saha u boo ye; te ga ta nawee- n Yāhā fāngangbāŋ yāã yīnde ne, loo nde kāmāy na Yāhā Dya myaha ga yi.»

⁵ Marti ma suhu u cīfua Maari ne, ma suhu Laasar ne, pe byε ntāŋ ba dye Yesu tāy.

⁶ Yesu tuu u Laasar yan wīl luhu, tuu pye teelii wo, u n kuee ma plii sīl pye ke fla na,

⁷ ma ba u kānyārwai pye ma yee, pe dur ga Yude kāntraha na.

⁸ U kānyārwai n u pye ma yee: «Yīnfua, yagaa ya pe Yiifee- naa n kε pe ma waa boo ntēmbar ne ke fla na, ma maha yee mboo ga dur ga ke fla na!»

⁹ Yesu n pe yē sya kakuācran ne ma yee: «Per neŋ laam wo, yai wee la ler sēnsye syām, ma gbe sukūhūntāy na, ma sya ga waa yainkōŋ wo? Wii u n yār yai na, u sē n kūn ye, u yāhācāã- yāã, koo kē.

¹⁰ Wii u -sē n yār yīmper wo, u n kūn, cāã- wee u na ye, koo kē.»

¹¹ Yesu tuu koo kaplāŋ pāã wa pe ye, u n pe pye ma yee: «Wo naambiyā Laasar sã n wāy; n n gaha u gbā yir.»

¹² U kānyārwai n u pye ma yee: «Yīnfua, u ma sã n wāy, u ga kāhā yir.»

¹³ U Laasar wāku wīl ne Yesu tuu ba pāã pe ye, pe sē le war ye, ma yee cīinde wāy Yesu u n yāŋ.

14 Yesu n le pãã laha pe ye loo na ma yee: «Laasar ku.

15 Too sê pye ke fla na ye, le tãý ra ye. Loo ga ta ye n ta sronj ta ye Yater. -Too ka u fla na!»

16 Loo na, Tema wii pe naa n yee Didim, koo yĩntaha wuhuwãã, u n pe kãnyãrwai mii pye ma yee: «Wo bya, -too yir taha u na, waa ku u ne.»

17 Yesu n ga dye gbe taha, ma luhu pe Laasar le wa gbĩ wo ke plii resyar kē.

18 Gbetane ke -sê pye Yurusalem tãý kilo tãã syi,

19 Yiiifee- busãã n ba pa Marti ye fla na Maari ne, maa pe lañ gbã syar pe ye.

20 Marti tuu luhu Yesu ma u n pai, u n ka maa u wãã; Maari -sê pye u ba tege nii kaha wo.

21 Marti n Yesu pye ma yee: «Yĩnfua, ma'a ne pye nwo, ta lañ saa ne ku ye.

22 Ke yagaa nge gε na, n cã, ma'a ngii nar Yãhã ye, ke ga le pye ma kē.»

23 Yesu n u pye ma yee: «Ma lañ ga yir gbã wo, u dur ba yrãñ na.»

24 Marti n u yě sya ma yee: «Driyě ma ba kua per gii, nawee- n ga yir gbã wo, pe nii yrãñ na, n cã Laasar bya ga ba yir gbã wo, u nii yrãñ na.»

25 Yesu n u pye ma yee: «Ndoo tē ma gbã yiafua, tesē ndoo tē ma yrã wããfua. Wii ma ra ta u Yater, u ma sya ku, u ga ba nii yrãñ na.

26 Tesē, wii ma pye yrãñ na, ma ra ta u Yater, ufua saa ku yãã ye. Ma loo nde sya la cĩĩnde?»

27 Marti n u yě sya ma yee: «Ãwã Yĩnfua, n cã mboo kē u Yãhã Yĩndefua Crise ne, woo wii u ma Yãhã Dya, woo wii u wãpañ bii cãã pãã yaha

driyě nge wo.»

²⁸ Marti tuu koo pãã wa, u n ter, ma ga u cĩifua Maari yee, u sě ta waa n yi le cãŋ na ye, ma u pye ma yee: «U Yĩŋfua ma nwo, u ma yee.»

²⁹ Maari tuu kaplãŋ ngĩ luhu, u n yir farfar, ma ka Yesu fla na.

³⁰ Yesu sě ba dye wa le klo wo ye. Marti tuu ba u wãã sya teelii wo, u pye nantãŋ koo fla na.

³¹ Yiiffee- mpãy pe Maari ne kaha wo, ma naa u flan, pe yãã u yir yi farfar, pe n taha u na, ma yee u yi n ter u n gaha wũn le gbĩ fla wo.

³² Maari tuu ga nɔ Yesu fla na, ma u yãã yĩnde ne, u n kãnkũy gbãã Yesu yaha ye, ma u pye ma yee: «Yĩŋfua, ma'a ne pye nwo, ta lan saa ne ku ye.»

³³ Maari naa n wũn, woo ma suhu pe Yiiffee-mpãy ne pe ba pa u ne. Yesu tuu pe yãã, u laam bye n wlãhã.

³⁴ U n pe yey ma yee, pe u le na? Pe n u pye ma yee: «Yĩŋfua, pa ma ba yãŋ.»

³⁵ Yesu yĩntãm n yi.

³⁶ Pe Yiiffee- pe loo yãã, pe n yee u dya ntãŋ dye Yesu tãy cĩinde.

³⁷ Poo mpãy n -sě le pãã ma yee: «Woo wii tuu u fũũ naa yĩmpɛ jaa u n waha n yãŋ, u saa ne pye la u ta, dya nwo ma n ku ye?»

³⁸ Yesu n ka le gbĩ fla na, u laam maha ba wlãhã u ye. Le gbĩ pye nkɔŋ dyan yãŋ mpĩy ntẽmbblaha fla na. Ntẽmbangbãŋ gaa pye, ke ba paha tã le gbĩ yě na.

³⁹ Yesu n yee pe ke ntẽmbangbãŋ klon kãã. U Laasar syafua Marti n Yesu pye ma yee, ke

nakugu dugu n yi, pe ke le le gbĩ wo ke plii resyar nanga.

⁴⁰ Yesu n u pye ma yee: «N sē ma pye la ma'a ra ta ma Yater, maa Yāhā fāngangbāñ yāā yīnde ne?»

⁴¹ Pe n ke ntēmbangbāñ klon kāā. Yesu n yīntaha kuā yir wāā yāhāyīñ kuε ye ma yee: «Ta Tuhufua Yāhā, taa ra wānar sya, n syaha wāā ma kē.

⁴² N cā ma ra wānar sya yalebyε. N le pāā nabuar mii wīī na, pe ra gbey le, pe n waha cā mboo ma ra nō wāā.»

⁴³ Yesu tuu koo pāā wa, u n tē sya fānga ne ma yee: «Laasar, yir yi!»

⁴⁴ Laasar wii u ba ku, u n yir yi, te trε ne tesē te klue ne te maha tā faasyīmbεε taa ne; u yīntaha ba maha tā fai wo. Yesu n pe nawee- pye ma yee: «-Ye u sāhā yaha, tee tyii u na u n ter!»

*Pe Yiiffee- yahaseefa Yesu ke wāboo ne
(Mat 26.1-5; Mar 14.1-2; Luke 22.1-2)*

⁴⁵ Pe Yiiffee- mpāy pe ba pa Maari ye fla na, poo busāā pe Yesu yāā tuu nde pye, pe n u wīī sya cīinde.

⁴⁶ Mpāy n -sē yir, ma ka Farisyē ye fla na, maa le pāā pe ye Yesu lii pye.

⁴⁷ Loo na, pe Yāhā yūndefa yīñfa n yir pe Farisyē ne, ma pe kaplāñ cεrfa wāā, ma le pāā ma yee: «Waa pye mii dya nwo ne? Ye sē yāā, u laanwō wūhū busāā pye.

⁴⁸ Waa tyii u na, nawee- byε ga ba u wīī sya cīinde, Wōrmefa ga ba wo Yāhā kangbāñ yoho pye klaha-, pe wo ter byε boo tāñ.»

⁴⁹ Mpāy pe ba pe ya wãã, poo nen waa pye, u myaha Kayifu, woo kē tuu pye pe Yāhā yūndefa yīñfua loo dyε. U n yir ma pe pye ma yee: «Ye sē laa cā ye.

⁵⁰ Ye sē laam ga ye. Le puar wo dya nen nwo ya boo, u n ku nawee- kur byε wī na, wo terfa byε ma n ku tãñ ye.»

⁵¹ Kapān nde le sya yi u yē wo, u sē cā ma yee u ya laam kapān sē ne le ba yi u yē wo ye. Tuu pye Yāhā yūndefa yīñfua loo dyε, koo kē Yāhā n u ta u n kapān nde cāã pãã yaha ma yee, Yesu yai u ku pe klofa wī na.

⁵² Le sē maha pye pe terfa ya wī na ye. Le pye Yāhā laampii kur byε wī na, pe nii yīmbui nen na, Yāhā laampii mpāy byε pe cāãñ driyē teebeε byε wo.

⁵³ Koo per na, pe n Yesu wāboo wī ta.

⁵⁴ Loo n ta Yesu sē maha naa u ya yar gbaa na pe Yiifée- na ye; u n ka tūntūn kusyīnde laa wo, tēyāfūũ klo tāy, pe le yee Yεflami, maa kuee ke fla na u kānyārwei ne.

⁵⁵ Yiifée- syayaha gbar ba gbe taha. Nawee- busāã n yir kui byε wo, ma dugu ga Yurusalem wo, pe n gaha pe kapī loho wey, pe nii gbεgbε te gbar n cā dye.

⁵⁶ Pe pye Yāhā kangbãñ wo, ma naa Yesu fla kε, ma nii pe ya yey, ncã u ga pa te gbar na laa?

⁵⁷ Pe Yāhā yūndefa yīñfa tesē pe Farisyē ne, pe ba yee, wii ma Yesu niisaha cā, u le pãã pe n ga u yigi.

*Maari lasekole woo Yesu trε na
(Mat 26.6-13; Mar 14.3-9)*

¹ Te syayaha gbar ba kuee plii kuay, Yesu n ka klo nde wo pe n yee Gbetane, Laasar fla na, wii Yesu ba u ta u n yir gbā wo, ma nii yrāṅ na.

² Pe n u nampay yi. Marti naa te dir yīntaha yi, Laasar pye pe sedifa ne Yesu ne.

³ Maari n lasekole waa gbe bui laa wo, le faa gboho. Pe woo lasekole yee nardi, nawām sē u dir yey ye. U n woo lasekole gbe, ma u woo Yesu trε na, ma dur ma u yīnyor ta ma Yesu trε kluā; ke kaha byε n ga nii u lasekole dugu fla.

⁴ Yesu kānyārwe waa pye, Syikaryotefa Yuda, woo kē u n pai Yesu yi u napī- kē. U n le pāā ma yee,

⁵ a nwa pe sē u lasekole par war nagbey sēnsye syi, ma pe war wāā fēnfa kē ye?

⁶ Le sē nii mii u naa fēnfa fēn di koo u n kapān nde pāā ye, u naa n yuhu, koo kē. Pe kānyārwai war sakole pye woo ye, pe ma war le, u ga mpāy yuhu yi.

⁷ Yesu n u pye ma yee: «Tyii cōo nwo na, ta kadye kē tuu gbihi wa wāleṅ na gbī wo ke syi.

⁸ Fēnfa ya dyaṅ, pe ma ye ne yalebye. Ndo -sē nwo, n saa ba pye ye ne per gaa ye.»

⁹ Yiifee- busāā n Yesu wāpa wī luhu ke Gbetane na, ma pa le klo wo. Le sē -sē ba nii mii pe pa Yesu ya wī na ye; pe ba pa pe n pai Laasar bya yāā yīnde ne, woo wii Yesu ba u ta u n yir gbā wo, ma nii yrāṅ na.

¹⁰ Pe Yāhā yūndefa yīnfa n Laasar bya wāboo wī pāā ta.

11 U wĩ ba Yiifee- busãã ta pe n dur naa n yi poo kur ye, ma naa Yesu woo ta pe Yater, koo kē.

*Nawee- Yesu sey ga dye Yurusalem wo
(Mat 21.1-11; Mar 11.1-11; Luke 19.28-40)*

12 Ke yĩnsyii wo, nabuar mpây pe ba ka te gbar wĩ na, pe n luhu Yesu ma u n pai ke Yurusalem wo.

13 Pe n mpẽn wan gbe, ma yi ga Yesu wãã, ma nii nuhu di, ma nii le gble ma n yee:

«Yĩnfua mboo wii taa n pai Yãhã myaha ne,
Yãhã ke kaa taha ma na,
mboo wii taa ma Yiisrefa Yĩnfua.»

14 Yesu n kãnkonyainge gaa yãã, ma dugu nii ke na ma n gaha, mii le bii cãã yrũhũ yaha Yãhã sabangbãñ wo ma yee:

15 «Syõ klofa, ye ma n fya ye,
ye yĩnfua nwo u n pai,
kãnkonyainge gaa na, tuu dugu nii.»

16 Yesu kãnyãrwai n kai- ngĩ yãã wãyãã ya, pe sã waha ke yĩntaha war le yale wo ye. Kur kuε ye, Yesu tuu ba kuã yir ga yãhã yĩñ na nayõr ne, pe n cã le tai cã ma yee, le ma le bii cãã yrũhũ yaha wa Yãhã sabangbãñ wo ma yee, nawee- ga ba Yesu sey, koo kē pe n ba le yãã le pye koo syi.

17 Yesu tuu ba Laasar yee le gbĩ laam wo, ma u ta u n yir gbã wo, ma nii yrãñ na, mpây byε pe ba pye ke fla na, pe naa Yesu wĩ pãã le ne.

18 Loo nde n ta, pe nabuar pe le luhu ma yee Yesu laanwo wĩ nde pye, pe n pe ya wãã ga ta u yahasee ye.

19 Pe Farisyẽ n nii pe ya pye ma yee: «Ye sã yãã, nawee- byε n gaha u ye, nde saa laa yõ wo kē ye.»

Jrɛkefa mpây, Yiifee- sê me ye, pe Yesu wĩ yey

²⁰ Jrɛkefa mpây ba pa te gbar na Yurusalem wo, Yâhâ seysaha wo.

²¹ Poo mpây n pa Filipe fla na, u n yi klo nde wo pe naa n yee Gbesyata, Galɛɛ kântraha na. Pe n Yesu wĩ yey waha u ye ma yee: «Yĩŋfua, wo n ke wo Yesu yââ.»

²² Filipe n le pãã Andere ye, pe n ka pe syãm, maa le pãã Yesu ye.

²³ Loo kur ye, Yesu n pe pye ma yee: «U Nawee Puee myaha yiyale nɔ wa.

²⁴ Ta n kakuãcran nde pãã ye ye: Sepua nen le ya ya, le ma yee le sê tâhã le kântraha wo ma fiy ye, le -sê ga kuee le ya ya. Le ma -sê tâhã le kântraha wo, ma ku, ma fiy, le ga pii buar see.

²⁵ Wii ma yee u ya yĩŋ wãke wĩ ya le n tãy u ye, woofua ga ba u yĩŋ ke laa; wii tuu -sê ga u ya yĩŋ wãke wĩ sye driyê nge wo, woofua ga ba cĩinde yrã yââ, lii wãkuayââ wee le na ye.

²⁶ Wii ma yee u ga ra wĩ pye, u naa n taha ra na; n ma pye na, u bya ga pye ke fla na. Wii ma ra wĩ pye, ta Tuhufua Yâhâ ga ta u myaha n yi.

²⁷ Yagaa, ta laam bye ma pe wlãhã nii ra ye. Tê ga lii gɛ pãã n sê cã ye; n yee la Yâhâ ta Tuhufua, le wãfã yale kuã ter ra na, lii le n pai nde? Aye, n saa loo pãã ye. N pa koo wãfã y nge wĩ na, n ga ke sya.

²⁸ Ta Tuhufua Yâhâ, ma miingbãŋ ta ke n gbobo!» Yĩmbui laa n yir yãhã yĩŋ na ma yee: «N ke gbobo wa, n ga maha ke ta ke n gbobo.»

²⁹ Nabuar rii te pye ke fla na, ma ba le yĩmbui luhu, te n yee, a yãhã gbãã tẽŋ kê. Mpây naa n

yee, a yāhāyīn tēnlēhe waa kē tuu pāā Yesu ne.

³⁰ Yesu n pe pye ma yee: «Yīmbui nde sē pāā ndoo wīī na ye, le pāā yii wīī na ma yee ye le luhu.

³¹ Yagaa, Yāhā kasāhā ga too driyēfa na. Yāhā ga driyē nge yīnfua Setane kar wāā.

³² Ndoo ma ba kuā yir ta, n ga ba ta, nawee-ter bye n pa ra ye.»

³³ Yesu kaplān ngīī naa le yar, gbā mpāy ter syi u n pai ku.

³⁴ Pe nabuar n u yē sya ma yee: «Kānde lii Yāhā le ta, le ma le yrūhū yaha ma yee, u Yāhā Yīndefua Crise saa ku yāā ye. Mboo -sē pye mii ma yee, u Nawee Puee ga ba kuā yir ta? Yoo kē u Nawee Puee ne?»

³⁵ Yesu n pe yē sya ma yee: «U Cāāfua ga maha yalaale ya dye ye nsoho wo. Tee -sē ma u Cāāfua ne, ye naa n yār u ne, wam ma syi pe ba ye fe gbe ye. Wii u n yār wam wo, u sē u ya kakue cā ye.

³⁶ Tee ma u Cāāfua ne, -ye u ta ye Yater, ye nii cāāfa.»

Yesu tuu koo pāā wa, u n ter, maa wūhū pe na deydey.

Mpāy pe sē Yesu ta pe Yater ye

³⁷ Yesu tuu sya laanwo wūhū busāā pye pe nawee- yīnde na, pe sē -sē u ta pe Yater ye.

³⁸ Loo ge -sē ne faale Yāhā kaplān tōrfua Yisa bii cāā pāā yaha. U bii yee:

«Too ke Yāhā wūhū pāā,
yoo ke sya wo ye?
Yoo Yāhā koho fānga yāā,
ma le sya cīinde?»

39 Poofa mii wĩ na, u Yisa maha bii le cãã pãã yaha ma yee:

40 «Yãhã pe ta fũũ- wãŋ syi;
ke maha pe ta pe laam n waha.

Mii loo sê ne ye, pe ma n yãŋ,
pe ga ke kai- yãã yĩnde ne,
pe ga ke war pe laam wo.

Pe ga ka Yãhã ye, ke n pe jaa yi kãã
pe kapee- wãpyeŋ wo.»

41 Yisa tuu bii Yesu nayõr yãã, koo kē u n bii kaplãŋ ngĩ pãã.

42 Pe yahaseefa mpãy -sê ba Yesu wĩ sya cĩinde. Pe sê -sê le pãã ye. Pe ba fya pe Farisyẽ na, ma yee poo ma le pãã, pe ga pe kar tã ke Yiifee- yawãhã nwoŋ na.

43 Ye sê yãã, pe naa myaha ke nawee- ye, pe sê naa myaha ke Yãhã ye ye, koo kē.

44 Yesu -sê ba le gbey pãã pe ye ma yee: «Wii ma ra wĩ sya cĩinde ma ra ta u Yater, ndoo ya sê kē u ta u Yater ye, ufua ra Nɔwããfua bya ta u Yater.

45 Wii ma ra yãã, ufua ra Nɔwããfua bya yãã.

46 N pa driyẽfa ye cãã- wãŋ syi dyaŋ, wii ma ra ta u Yater, ufua ma n kuee wam wo ye.

47 Wii ma ra kaplãŋ luhu, ma -sê ke sye, ndoo sê kē tē ga ufua sãhã ye. Ye sê yãã, n sê pa driyẽfa wãsãhã yĩmbui ne ye, n pa pe wãsyayaha yĩmbui ne.

48 Wii ma ra sye, ma maha ra kaplãŋ sye, u sãhãfua ma; kaplãŋ nkãy tē n pãã, koo kē ke n pai u sãhã, driyẽ ma ba kua.

⁴⁹ Ye sê yãã, ta ya wĩ sê ne tẽ n pãã ye; ta Tuhufua Yãhã gii ke ra nɔ wãã, koo gɛ ra yar kai- nkãy ne, n yai n ke tɔr yar nawee- na.

⁵⁰ N -sê cã ke kai- nkãy ta, ke cĩnde yrã wãã nawee kẽ. Loo ne, ta Tuhufua Yãhã ke ke kai- yar ra na mii, n ke yar nawee- na koo syi.»

13

Yesu u kãnyãrwai trɛ yee

¹ Te syayaha gbar te ba gbe taha, Yesu n cã u yale nɔ wa, yale lii tuu ga yir driyẽ nge wo, u ka u Tuhufua Yãhã fla na. Driyẽfa mpây byɛ pe ntãŋ dye u tãy, pe n nii u wãm, u n ta pe ntãŋ n dye kuee yai u tãy.

² Yesu pye u kãnyãrwai ne dir na yĩmper wo. Syikaryɔtɛfa Syimu dya Yuda -sê nwo, sãndãpee yĩŋfua Setane ba Yesu wãyi wĩ le wa u laam wo, u Yesu yi u napĩ- kẽ.

³ Yesu ba cã, woo Yesu yi Yãhã fla na, u ga maha dur ga Yãhã fla na, tesê Yãhã kai- byɛ le soho u koho wo.

⁴ Yesu n yir dir na, ma nayroho fɛr, ma lawey fai laa gbe maha nsĩ wo.

⁵ Loo kur ye, u n loho le tasangbãŋ wo, ma nii u kãnyãrwai trɛ yee pe kẽ, ma te kluã lawey fai lii ne, tuu ba gbe maha nsĩ wo.

⁶ U n ba nɔ Syimu Pyar na, u n u pye ma yee: «Yĩŋfua, mboo yai la ma ra trɛ yee?»

⁷ Yesu n u yẽ sya ma yee: «Lii tẽ n pye nde, ma sê le war ye, maa ba le war kur kue ye.»

⁸ Pyar n u pye ma yee: «Aye, n saa sya yāã ma n ta trε yee ye.» Yesu n u pye ma yee: «N ma yee n sē ma yee ye, ma saa ba ma lay yāã ra ye ye.»

⁹ Syimu Pyar n u pye loo na ma yee: «Yīñfua, le ma pye ke syi, ta trε yee, maha ra klue bya ne, ta yīñ bya ne.»

¹⁰ Yesu n u pye ma yee: «Wii ma wey laha, u trε ya ne te yai te yee, u n nii tāñ gbεgbε. Ye nii wa gbεgbε, ye byε sē -sē me ye.»

¹¹ Yesu ba cā wii u n pai u yi u napīi- kē, koo kē u n yee pe byε sē me pe ma gbεgbε ye.

¹² Yesu tuu pe trε yee wa, ma u nayroho le wa, u n dur ga tege nii u niisaha wo, ma pe pye ma yee: «Tē lii pye ye na, ye le war la?»

¹³ Ye ra yee kaicāfua, ma maha ra yee yīñfua. Le sron, n ma koo syi.

¹⁴ Ndoo wii n ma ye yīñfua, ma maha ma ye kaicāfua, ya'a yāã ndoo tē ye trε yee, ye bya ye yai ye naa ye trε yee yii kē!

¹⁵ Ye sē yāã, kai ne tē pye yar ye na ma yee tē ye pye mii, ye bya yai ye naa nii yii ne koo syi!

¹⁶ Ta n cīinde nde pāã ye ye, tēntēle sē ter u yīñfua yaha ye, tesē tēnlεhε sē ter u lehεfua yaha ye.

¹⁷ Ye ma kai- ngīi cā, ye wīi n tāy, -tee -sē naa koo pye!

¹⁸ Ye byε sē me tē n yāñ ye. Mpāy tē yāñ yi, n pe cā. Lii le -sē cāã yrūhū yaha Yāhā sabangbāñ wo, loo ne le n pye yagaa. Le ma le yrūhū yaha ma yee: «Wii u wāã n di ra ne, u wā klaha ma nii ra napīi.»

¹⁹ N ga cāã naa ke kai- tōr ye ye, ke ma ba nii n pye, ye waha cā ndoo ma ngii, ye le sya cīinde.

²⁰ Ta n cīnde nde pāã ye ye: N ma nawee lehe wāã, wii ma ga u wīi sya, ndoo ge wīi kē tuu sya. Wii ma -sē ra wīi sya, Yāhā giu ke ra lehe wāã, koo ge wīi ne tuu sya.»

*Yesu yee u kānyārwe waa ga u yi u napī- kē
(Mat 26.20-25; Mar 14.17-21; Luke 22.21-23)*

²¹ Yesu tuu koo kaplāŋ ngīi pāã wa, u laam bye n wlāhā, u n yee: «Ta n cīnde nde pāã ye ye: Ye laam wo, waa ma u ga ra yi ta napī- kē.»

²² U kānyārwai n nii pe ya yāŋ n klaha, pe sē ba cā yoo kē u naa n yāŋ ye.

²³ U Yesu kānyārwebua -sē pye, u ba nii Yesu tāy.

²⁴ Syimu Pyar n koho yāhā wāã u ye, u Yesu yey yoo kē u n yāŋ.

²⁵ Woo kānyārwe nwo n u ya kāāŋ Yesu kue ye, ma u pye ma yee: «Yīŋfua, yoo kē?»

²⁶ Yesu n u yē sya ma yee: «Tē ga dir pāhā wāã wii kē, woo kē.» U n dir raa gbe, ma te pāhā, ma te wāã Syikaryotefa Syimu dya Yuda kē.

²⁷ Yuda tuu te dir sya wa, sāndāpee yīŋfua Setane n dye u laam wo. Yesu n u pye ma yee: «Taa yee ma ga lii pye, le pye farfar.»

²⁸ Mpāy bye pe pye te dir na, pe sē le war nwa Yesu n le pāã Yuda ye ke dyaŋ ye.

²⁹ Mpāy naa le ga, a u Yuda tuu ma pe war sakole ne, laa na Yesu yee, wān tii bye wīi te ga ba pye poo na te gbar nde na tē n pai, u te bye par. Pe maha naa le ga, a laa na Yesu Yuda pye u ngaa wāã nawām kē.

³⁰ Yuda tuu te dir sya wa, u n ta ter yi ma ter. Yīmper ba wo wa.

Yesu kãnfuẽ laa yar u kãnyãrwai na

³¹ Yuda tuu yi ter wa, Yesu n u kãnyãrwai pye ma yee: «Yagaa, u Nawee Puee miingbãŋ ga yi, Yãhã miingbãŋ bya ga yi u kãmay na.

³² Yãhã miingbãŋ ma yi u kãmay na, Yãhã bya ga ba u miingbãŋ yi ke ya kãmay na; ke ga ba le pye yagaa.

³³ Ta cĩifa, yalaale ga maha ra yãã ye ne. Loo kur ye, ye ga ba naa ra ke. Tẽ ba pe Yiifee-yahaseefa yar lii ne, n ga maha ye yar loo wĩ nen ya ne. Tẽ n gaha na, ye saha ka ke fla na ye; n ga ye bya yar le ne yagaa.

³⁴ N ga kãnfuẽ laa yar ye na: Ye tyii ye ntãŋ n naa n dye yii tãy; ye ntãŋ pe dye ra tãy mii, ye bya ye tyii ye ntãŋ n naa n dye yii tãy koo syi!

³⁵ Ye ntãŋ ma dye yii tãy, nawee- bye ga cã pe yee ta kãnyãrwai me ye ne.»

*Yesu Pyar yar u ga ba woo wĩ kai tehẽ tãã
(Mat 26.31-35; Mar 14.27-31; Luke 22.31-34)*

³⁶ Loo kur ye, Syimu Pyar n Yesu yey ma yee: «Yĩŋfua, ma n gaha na?» Yesu n u yẽ sya ma yee: «Tẽ n gaha na, maa ba taha ra na kur kue ye, yagaa sã -sã kã ye.»

³⁷ Pyar n u pye ma yee: «Yĩŋfua nwa ma n yee, n saha taha ma na yagaa ye? N ma sya ga gbã yãã ma wĩ na, n yer le na.»

³⁸ Yesu n u yẽ sya ma yee: «Ma sã yee la maa ku ra wĩ na? Ta n -sã cĩinde nde pãã ma ye: Ngupuai saa kui wa ye, ma ga ba ta wĩ kai wa tehẽ tãã, ma yee ma sã ndoo cã ye.»

14

Yesu ya kě u ma Yāhā fla kānde

¹ Yesu n maha u kānyārwai pye ma yee: «Ye ma syi ye laam n wlāhā ye ye ye! -Ye koho taha yaha Yāhā na, -tee -sě koho taha yaha ra bya na!

² Ta Tuhufua Yāhā fla na, niisar nihi. Le ma ne pye cīnde sě ne ye, n ne ga pye n le pāā ye ye. Ye sě yāā, n n gaha niisar gbihi ye kě ke fla na.

³ N ma ba ka, maa ye niisar gbihi wa, n ga dur ba ye ye, n ba ye gbe ga ta nii tāy koo fla na. Loo na, ndoo tē ma na, ye bya ga ba pye koo fla na.

⁴ Kānde lii le n gaha ta kasaha wo, ye loo kānde cā.»

⁵ Tema n u pye ma yee: «Yīnfua, too sě -sě ma kasaha cā ye, wo ga pye mii wo koo fla kānde cā?»

⁶ Yesu n u yē sya ma yee: «Ndoos tē ma le kānde; ndoo tē ma le cīnde; ndoo tē ma le yrā. Waa saha ka Yāhā fla na mii ndoo kāmāy sě ne ye.

⁷ Ye ma ndoo cā, ye ga ra Tuhufua Yāhā bya cā. Ke yagaa nge gε na, ye ke cā wa gε cā wa, ye maha ke yāā wa yīnde ne.»

⁸ Filipe n yee: «Yīnfua, ma Tuhufua Yāhā yar wo na, loo ya ga tāy wo ye.»

⁹ Yesu n u yē sya ma yee: «N ma ye ne le yale syi ma na? Loo naa bye ne, ma sě maha ra cā ye Filipe! Wii ma ra yāā, ufua ta Tuhufua Yāhā yāā. Ma -sě pye mii ma yee, n ta Tuhufua Yāhā yar ye na?

¹⁰ Ma sě cā la ma yee, ndoo tesē ra Tuhufua Yāhā ne, wo ma nen? Ta Tuhufua Yāhā, tesē ndoo ne, wo ma nen. Kaplāŋ nkāy tē n pāā ye

ye, ndoo yě kaplāŋ sē kē ye; ta Tuhufua Yāhā gii, koo ndoo ne, wo ma nen, koo kē ke koo kai- ngĩ bye pye.

¹¹ N yee, ndoo tesē ra Tuhufua Yāhā ne, wo ma nen, -ye le sya cĩnde! Ye ma yee ye sē ra kaplāŋ sya cĩnde ye, kai- nkāy ke n pye, -ye koo sya cĩnde!

¹² Ta n cĩnde nde pāā ye ye: Wii ma ra ta u Yater, kai- nkāy tē n pye, ufua bya ga waha koo pye. Tē nwo n n gaha ta Tuhufua Yāhā fla na, loo ga ta ufua n waha kai- nkāy pye, ke ter ge ter ra wũhũ yaha.

¹³ Kai- nkāy bye tee ga ba nar ra myaha ne, n ga ba ke pye ye kē, ta Tuhufua Yāhā miingbāŋ n yi ta kāmāy na, ndoo wii n ma ke Dya.

¹⁴ Ye ma ngii nar ra myaha ne, n ga ke pye ye kē.»

Yesu yě ter Yāhā Yrā Fānga wānɔwāā ne

¹⁵ Yesu n maha yee: «Ta ntāŋ ma dye ye tāy, ye ga ra kaplāŋ le yaha ye laam wo, -ye naa koo pye!

¹⁶ N ga ra Tuhufua Yāhā nar ke Koholefua waa nɔ wāā ye kē. Woo kē Yāhā Yrā Fānga ne. Le ga ba pye ye ne yalebye.

¹⁷ Loo cĩnde Yrā saha pye yāā driyēfa ye ye. Pe saha le yāā yĩnde ne ye, pe saha le cā ye, koo kē. Yii poo na, ye le cā; ye sē yāā, le ma ye ne, le ga dye ye laam wo, koo kē.

¹⁸ N saa ter n ye yaha yii ya mii ncir- wāŋ syi dyaŋ ye; n ga dur ba ye ye.

19 Yalaale wo, driyěfa saa ra yãã nantãŋ ye. Yii -sě ga ba naa ra yãã. Ye sě yãã, n ma yrãŋ na, koo kě ye bya ga ba nii yrãŋ na.

20 Koo per ma nɔ, ye ga le war ye yee, ndoo tesě ra Tuhufua Yãhã ne, wo ma nen; tesě yii ndoo ne, wo ma nen; ndoo yii ne, wo ma nen.

21 Wii ma ra kaplãŋ le yaha u laam wo, ma nii u troho tãhã koo kãnde na, woo kě ta ntãŋ dye u tãy. Woofua ntãŋ -sě ga dye ra Tuhufua Yãhã tãy, ndoo bya, u ntãŋ ga dye ra tãy, n ga ta u n ta yãã.»

22 Yuda wii, Syikaryɔtefa Yuda sě kě woo ne ye, u n Yesu pye ma yee: «Yĩŋfua, maa pye mii ma ta wii n ma yãã, pe driyěfa poo saa ma yãã ye?»

23 Yesu n u yě sya ma yee: «Ta ntãŋ ma dye wii tãy, ufua ga ra kaplãŋ le yaha u laam wo; u ntãŋ -sě ga dye ra Tuhufua Yãhã tãy. Ta Tuhufua Yãhã tesě ndoo ne, waa pa ufua ye, wo ba wo niisaha ta u ye.

24 Wii ma -sě yee ta ntãŋ sě dye u tãy ye, ufua saa ra kaplãŋ sya ye. Kaplãŋ nkãy bye tē n pãã ye ye, ndoo yě wũhũ sě kě ye, ta Tuhufua Yãhã gii ke ra nɔ wãã, koo yě kaplãŋ kě.

25 Tē nwo n ma ye ne nantãŋ, n koo kaplãŋ ngĩ bye pãã ye ye.

26 Yãhã Yrã Fãnga gii ke n pai nii ye Koholefua, Yãhã ga ba ke nɔ wãã ye ye ta draha wo. Loo Yãhã Yrã Fãnga nde ga ba naa ye klahã kai- bye ne, le ga ba naa ye laam too kaplãŋ nkãy bye ne tē pãã ye ye.

27 Tē nwo n n ter, n ga yrĩŋ yaha ye na. Yrĩŋ mpãy pe ma ndoo wãm, n ga maha poo wãã ye

kē. Ndoo yrīŋ wee mii driyēfa yrīŋ dyaŋ ye. Ye ma syi ye laam n wlāhā ye ye ye, ye ma n fya ye!

²⁸ Tē ye yar ma yee n ga ter, tē ba dur ba ye ye, ye le luhu wa. Ta ntāŋ ma dye ye tāy cīinde, ye ga ne naa nuhu di ta wāka wīī na ta Tuhufua Yāhā fla na. Ye sē yāā, ta Tuhufua Yāhā ter ndoo yaha.

²⁹ Yagaa, n ye cāā yar wa koo kai- ngīī ne. Loo na, ke ma ba nii n pye yaliile wo, ye ga le sya cīinde ne tē naa n pāā ye ye.

³⁰ Draha sē gboho ra ye nantāŋ ta n ga kaplāmbuar pāā ye ne ye. Ye sē yāā, driyē yīnfua Setane ma u n pai ra fla na. U saha yia ra na laa ne ye.

³¹ N -sē yai n ta, driyēfa n cā pe yee ta Tuhufua Yāhā ntāŋ dye ra tāy, ke kai- nkāy bye yar ra na, koo kē tē n pye.

-Ye yir yi nwo, wo n ter!»

15

Yesu yee woo tuu ma cīinde defīī katyigi

¹ Yesu n maha u kānyārwai yar ma yee: «Ndoo tē ma cīinde defīī katyigi tepeŋ, ta Tuhufua Yāhā koo ke ma ke gbihifua.

² Kayay rii te ma ra na, te ma yee te sē n sa ye, ke re cer n kāā. Tii ma -sē n sa, ke too sā ma te gbihī, ma n ta kaa n taha te wāsa na.

³ Yii mpāy tee mii kayay tii dyaŋ te gbihī wa, ta kapān ne le ye ta koo syi.

⁴ Loho ke sē waha n yi ra nsoho wo ye wīī ne ye mii, -ye bya ye nii ra wīī ne ke syi. Ye katyigi kayan gaa yāā yāā la, pe cer miy yaha, ke n sa

yãã? Yii ma yee ye sê ra yigi, wo n nii loho sê n yi wo nsoho wo ye, yaa nii koo kayan nge wãñ syi, ye saa sa yãã ye.

⁵ Ndoos tẽ ma ke tepen, yii -sẽ ma te kayay. Wii ma nii loho sê n yi u nsoho wo ra wĩ ne ye, ta bya n -sẽ nii loho sê n yi ra nsoho wo u bya wĩ ne ye, woofua nwo na u ga kayũhũ sa gboho. Wii ma -sẽ u ya cẽr kãã ra na, woo saa waha naa n yigi laa gẽ ye ye.

⁶ Wii ma sye, u sê ta wo n nii loho sê waha n yi wo nsoho wo ye, woofua nwo ga nii mii ke kayan wãñ syi dyan, kayan gii pe ma ne cẽr, pe gbe ga miy yaha, ke n waha. Ke ma waha wa, pe ke pãã ga le naa wo, ke n suhu.

⁷ Ya'a ra wĩ yigi, loho sê waha n yi ye nsoho wo ra ne ye, ya'a sya lii syi nar Yãhã ye, ke ga le pye ye kẽ.

⁸ Ya'a sya ma kayũhũ sa gboho, loo nde ga ra Tuhufua Yãhã miingbãñ yi. Nawee- ga maha cã pe yee, ye ma ra kãnyãrwai.

⁹ Ta ntãñ pe dye ra Tuhufua Yãhã tã y mii, ye bye ntãñ dye ra tã y koo syi dyan. Ye tyii ye ntãñ n dye kuee yai tãñ ra tã y!

¹⁰ Tẽ ra Tuhufua Yãhã kaplãñ sya, loo le ta ra ntãñ n dye kuee u tã y. Ye bya, ya'a ra kaplãñ sya, ma nii ke pyefa, ye ntãñ ga dye kuee ra tã y koo syi dyan.

¹¹ N loo nde pãã ye ye, ye n waha ta nuhu ter syi yãã, ye laam bye n nii nuhu fla ye ye.

¹² Lii tẽ n ke ye ye loo ne nde: Ye ntãñ pe dye ra tã y mii syi, ye tyii ye ntãñ n dye yii tã y koo syi!

13 Ma'a ma naambiyãm gbã sya ma ku pe draha wo, ntãŋ mpãy wãdye saa waha ter loo nde yaha ye.

14 Lii tẽ n pãã ye ye, ye ma ke sya ma nii ke pyefa, ye ga kuee yai tãŋ ra naambiyãm.

15 N sã ye yãŋ ra tẽntẽbir ye, n ma ne pye tẽ ye yãŋ ta tẽntẽbir, n ga ne ta laam wũhũ tõr naa n yar la ye na? N ye yãŋ ra naambiyãm, mii loo sã ne ye, n saa ne ta ye ne ta wĩ laa ge cã ta Tuhufua Yãhã wĩ ne ye.

16 Yii la tee ra yãŋ yi? Ndoosã na tẽ ye yãŋ yi, ma yee kayay tii syi te sa n gboho, -ye nii koo syi dyaŋ, ye naa kayũhũ pye, kayũhũ nkãy ke n ma-? Ye ma ngii ngii nar ra Tuhufua Yãhã ye ra myaha ne, ke ga ke pye ye kã.

17 N yee, ye tyii ye ntãŋ na pe n dye ga pe ya tãŋ, loo ne tẽ sroŋ n ke ye ye.»

Yesu tesã u kãndeyãrfa ne, pe wĩ sye driyẽfa ye

18 Yesu n maha yee: «Driyẽfa ma napĩr le ye ne, ye le cã pe cãã napĩr le wa ra ne, ma cã ba no ye na.

19 Ke ma ne pye ye ma driyẽfa ne yĩmbui nen na, pe ga ne naa n tãŋ ye ne. Pe ga ne ye tõr naa n yigi pe ya ne. Tẽ -sã nwo, tẽ ye tyõr yi kãã driyẽfa kuẽ koho ye, ye n nii ye sã n tõr pe ne ye, loo ne le pe ta ye wĩ n fũhũ pe ye.

20 -Ye ye laam too nde na tẽ ba ye pye ma yee: Tẽntẽle sã ter u yĩŋfua yaha ye. Pe ma ra ka n nuhu, pe ga ba naa ye bya pye ke syi. Pe ma ra kaplãŋ sya, pe ga ba naa ye bya wũhũ sya.

²¹ Ta myaha ga ta, pe n koo kai- ngĩ bye pye ye na. Pe tee mii pe sê Yâhã cã ye, koo gi ke ra lehe wãã.

²² Ke ma ne pye n sê pa ma ba Yâhã laam wũhũ t̄or pe ye ye, kapee- saa ne pye pe yĩŋ na ye. Yagaa t̄e -sê nwo t̄e Yâhã laam wũhũ t̄or pe ye, pe saha yee poo sê laa cã wa, ma naa kapee- pye ye.

²³ Ta wĩ ma fũhũ wii ye, ta Tuhufua Yâhã wĩ bya fũhũ ufua ye.

²⁴ Ke ma ne pye, n sê laanwo wũhũ pye pe n yãã yĩnde ne ye, nkãy syi nawee waa sê ke pye yãã ye, kapee saa ne pye pe yĩŋ na ye. Yagaa n -sê nwo t̄e laanwo wũhũ pye pe n yãã, wo wĩ n maha fũhũ pe ye, ndoo, tesê ra Tuhufua Yâhã ne.

²⁵ Kai- ngĩ bye n pye, kapãn lii le bii cãã yrũhũ ta Yâhã sabangbãŋ wo, loo ne le n pye. Loo kapãn nde: <Ta wĩ fĩhĩ ka fũhũ pe ye ke dyaŋ, laa sê ne laa ne ye.>

²⁶ Koholefua wii u ma paŋ na, woo kê Yâhã Yrã lii ne pe n yee Yâhã Cĩinde Yrã. N ga ba le no wãã ye kê Yâhã kãmay na, le n ba ra wĩ pãã.

²⁷ Ye bya, tee -sê mii ra ne ta t̄en fegbesaha wo, ye ga ba naa ra wĩ pãã yii ndoŋ.»

16

¹ Yesu n maha u kãnyãrwai pye ma yee: «N koo ngĩ bye t̄or ma ye yar, ke ma ba nii ye dye, ye ma n ba dur yi ra kur ye ye.

² Pe ga ba ye tã Yiiffee- yawãhã nwey na. Yalaa ga ba no, ye boofa ge ga ba naa le ga, a poo Yâhã laam wũhũ pye ke syi.

³ Pe tee mii pe sê Yâhã cã war ye, pe sê maha ra bya cã war ye, pe ga ba tee naa n pye ke syi.

⁴ N koo ngĩ bye tōr ma ye yar, yalaale wo pe ma ba yir ke wāpyeŋ na, ye waha le cã ye yee, n ba le cãã tōr wa ye ye. N sê ba cãã koo ngĩ tōr ye ye ye, n pye ye ne yalebye, koo kē.»

Yâhã Yrã Fãnga tẽn

⁵ Yesu n maha yee: «Yagaa, n nwo tẽ ga ter ra Tuhufua Yâhã fla na, koo gii ke ra nɔ wãã. Yii waa ge sê -sê ra yey ma yee ma n gaha na ye.

⁶ N le cã nkãy tẽ n pãã ye ye, koo kē ke ye laam wlãhã.

⁷ Cĩnde -sê ne tẽ n yar ye na; n ma ter, ke ga puar ye na. N ma yee n sê ter ye, u Koholefua wii u yai u pa ye ye, u saa pa ye. N ma -sê ter, n n gaha u nɔ wãã ye ye.

⁸ Woo nwo ma ba pa, u ga ba driyẽfa yar pe n cã pe plaha pe kapee- wāpyeŋ kue ye, pe plaha nkãy kue ye ke sroŋ, pe maha plaha Yâhã kasãhã kue ye.

⁹ Pe kapee- wāpyeŋ kue ye, pe plaha. Pe sê ra ta pe Yater ye, koo kē.

¹⁰ Kai- nkãy ke sroŋ, pe plaha koo kue ye. N n gaha ra Tuhufua Yâhã tãy, waa saa ra yãã nantãŋ ye, koo kē.

¹¹ Yâhã kasãhã kue ye, pe maha plaha. U driyẽ yĩŋfua Setane sãhã wa, u fãnga pye klaha- wa, koo kē.

¹² Kai- busãã ma ra yẽ na wãtōr wũhũ ye ye, ye sê -sê ga waha ke yĩntaha war yagaa ye.

¹³ Yâhã Yrã lii le ma cĩnde ne, le ma ba pa, loo le ga waha ba naa ye sroŋ ke cĩnde bye wo. Le

ya laam wũhũ sē kē le n pai ta le naa n tōr ye ye ye. Kai- nkāy bye le luhu Yāhā ye, koo kē le n pai tōr naa ye yar, tesē nkāy ne ke ga ba dye kur ye.

¹⁴ Le ga ba naa ra kai- sya ra ye, le ba tōr naa ye yar. Le ga ba ta ra myaha n yi koo syi ne.

¹⁵ Lii ma pye ra Tuhufua Yāhā wĩ, le ma ra bya wĩ. Loo ne ra n yee, Yāhā Yrā Fānga ga ba ra kai- sya ra ye, le ba tōr naa ye yar.»

Laanwlaŋ wā klaha nuhu

¹⁶ Yesu n maha yee: «Saa ma pye, ye saa ba ra yāā ye. Loo kur ye, saa ma maha pye, yaa ra yāā.»

¹⁷ U kānyārwai mpāy n pe ya yey le ne ma yee: «Ye nde yīntaha cā la u ne tuu n tōr, ma nii wo pye ma yee: <Saa ma pye, ye saa ba ra yāā ye. Loo kur ye, saa ma maha pye, yaa ra yāā.> Ma suhu nde ne tuu maha yee: <N n gaha ra Tuhufua Yāhā tāy.>

¹⁸ Tuu yee saa, saa gii ge kē koo ne u n yāŋ? Nkāy ter tuu n tōr wo ye ngĩ, waa sē ke yīntaha cā u ne ye.»

¹⁹ Yesu tuu cā pe u kaplāŋ yīntaha ke u ye, u n pe pye ma yee: «Nde tē tōr yar ye na ma yee, saa ma pye, ye saa ba ra yāā ye. Loo kur ye, saa ma maha pye, yaa ra yāā. Loo nde syi wĩ la tee nii yii yey le yīntaha ne?

²⁰ Ta n cīinde nde pāā ye ye: Ye mii yaa ba naa kayaan miyāhā wũn ta wĩ na. Loo ga ba nuhu yigi driyēfa kē. Cīinde, ye laam ga ba wlāhā. Kur ye, ye laanwlaŋ ga ba wā klaha nii nuhu.

²¹ Ta n laa tōr yar ye na: Lai ma cōo yigi u n ga see, u ma u ya fēn yāŋ, u laam ga wlāhā. U ma

-sê waha see wa, ma ke pëyãhã yãŋ, u ga faha te fën bye yaha, tii tuu sya. U ma yãŋ u ga yãã u nawee see le driyẽ wo, loo nde n nuhu yigi u kã.

²² Ye bye sê na ke syi yagaa, ye laam pe wlãhã ye ye? Waa maha ba wii yãã yahamba, ye laam n nii nuhu fla, waa ge saa waha poo nuhu yi kãã ye laam wo ye.

²³ Koo cãã nge ma ba nɔ, ye saa maha ba ra yey laa ne ye. Ta n cĩnde yar ye na, ya'a ba nii nkãy nar Yãhã ye ra myaha ne, ke ga ba naa ke pye ye kã.

²⁴ Ma sya ba waa yagaa na, ye sê ngaa nar yãã Yãhã ye ra myaha ne ye. -Ye naa ke nar, ke ga ye kã, ye laam n nii tãŋ ye ye nuhu fla.»

Yesu driyẽ yia

²⁵ Yesu n maha yee: «N koo ngĩ bye tãr ye ye kakuãcran ne. Yalaale -sê nde le n pai, le ma ba nɔ, n saa ba ra Tuhufua Yãhã wĩ laa tãr ye ye kakuãcran ne nantãŋ ye. N ga ba ke bye tãr naa n yi ye ye gbaa na.

²⁶ Koo cãã nge ma ba nɔ, ndoo ya sê kã tã ga ba naa ra Tuhufua Yãhã nar ye kã ye. Ye bye ga ba waha naa Yãhã nar yii ya ra myaha ne.

²⁷ Ye sê yãã, ye ntãŋ dye ta Tuhufua Yãhã tãy. Ta ntãŋ dye ye tãy, ye maha le sya n yi ke tãy, koo kã.

²⁸ N yi ra Tuhufua Yãhã tãy, ma pa driyẽ wo. N nwo, yagaa tã ga yir driyẽ wo, n dur ga ra Tuhufua Yãhã tãy.»

²⁹ U kãnyãrwai n u pye ma yee: «Yagaa woo sê na taa tyii kakuãcran wãpãã na, ma gbihi pãã n yi gbegbe?»

³⁰ Yagaa woo, wo fîhî le sronj cã laha taa kai-bye cã tãŋ, nawee laam wîi laa sê wũhũ ma na ye. Koo syi kê, wo n ma ta wo Yater, ma cã ma yi Yãhã tãy.»

³¹ Yesu n pe pye ma yee: «Yagaa woo la tee ra ta ye Yater?»

³² N -sê cã, yale laa nde le n pai, le no wa ge no wa, ye bye ga ba fã cãŋ ter ra yaha, yii wuhu na, ra n kuee nii ya. N -sê cã, n saa ba kuee nii ya ye, ta Tuhufua Yãhã ga ba pye ra ne.

³³ N koo ngîi bye pãã ye ye, ye waha yrîŋ yãã. Yaa fen yãã driyẽ koho wo, -tee -sê tetege le yii na, n yia wa driyẽ na.»

17

Yesu kai- busãã pãã Yãhã ne, ma ke nar u nawee- wîi na

¹ Yesu tuu pãã wa ke syi, u n yîntaha kuã yir wãã ncha ye, ma u Tuhufua Yãhã pye ma yee:

«Ta Tuhufua, le yale no wa, ta ma Dya miingbãŋ n yi, u bya n -sê ta ma miingbãŋ n yi.

² Ma nwo, taa fãnga bye wãã u kê, ma yee nawee- mpãy taa wãã u kê, u waha pe ta pe n cîinde yrã yãã, lii wãkuayãã wee le na ye.

³ Cîinde yrã, le wîi le ma lii ne loo ne nde: Nawee- n waha ma cã, mboo wii ya taa ma cîinde Yãhã, pe maha Yesu Crise cã, woo wii taa no wãã pe ye.

⁴ N ma myaha gboho kãntraha na. Taa ra taha lii na, n le bye yîntaha yi.

⁵ Ta Tuhufua, cãã gii cãã driyẽ sê bii tãhã wa ye, n pye ma tãy ma nayõr wo. Yagaa, ta, ra

miingbãŋ n yi, -taa ra gbe ga ta mii tãy too nayõr wo!

⁶ Nawee- mpãy raa tyĩn sya driyẽ koho wo, pe ma ma wãm, ma pe wãã ra kē, pe n nii ra wãm. N ta pe n ma miingbãŋ cã. Pe ma kapãn le yaha pe laam wo.

⁷ Yagaa, pe cã ngii taa wãã ra kē, ke yi ma fla na.

⁸ Ma sē yãã, kaplãŋ nkãy taa pãã ra ye, n ba ke bye tõr pe ye, pe n ke sya. Pe mii pe le yãŋ cã ma yee, tē sron yi ma fla na, ma maha yee, a mboo taa ra nɔ wãã.

⁹ N ma nar poo nawee- mii wĩ na. N sē ma nar driyẽfa wĩ na ye. Mpãy taa wãã ra kē, n ma nar poo wĩ na. Pe ma ma wãm.

¹⁰ Ta kla, ma kla; ma kla, ra bya kla kē. Ta miingbãŋ n yi poo kãmay na.

¹¹ N nwo, yagaa tē ga ka ma fla na. N wee tē n tõr kãntrahafa ne nantãŋ ye, poo -sē mii pe n tõr kãntrahafa ne. Ta Tuhufua Yãhã, mboo wii ma kai- laha, koho paha tã pe na ma myaha wĩ na, myaha gii raa wãã ra kē, pe n waha wãã le, pe nii yĩmbui nen ne ma dyaŋ ra ne.

¹² Tē pye pe ne, mpãy taa wãã ra kē, n paha pe na ma myaha fãnga kãmay na. Waa ge sē plaha ye, ma yi kãã wii na tuu ba yai wãplaha ne, loo ne Yãhã sabangbãŋ ke le cãã tõr yaha.

¹³ Yagaa tē ga ka ma fla na, koo syi kē ta nii n pãã ke syi, tē nwo nantãŋ kãntraha na pe ne. Loo n waha ta pe laam n nii tãŋ ta nuhu ne.

¹⁴ N ma kapãn tõr yar pe na, pe wĩ n fũhũ driyẽfa ye. Pe wee driyẽfa kãnde wo ye, mii ta dyaŋ tē wee driyẽfa kãnde wo ye, koo kē.

15 N sê ma nar taa pe gbe yi kãã driyê wo ye, n ma nar, ma naa pe paha sãndãpee yĩnfua Setane na.

16 Pe wee driyêfa kãnde wo ye, mii ta dyaŋ tẽ wee driyêfa kãnde wo ye.

17 Pe ta pe n sroŋ nii ma wãm, ma cĩnde kãmaya na. Ma kapãn loo ne le ma cĩnde.

18 N pe lehe wãã driyê wo, mii taa ra lehe wãã driyê wo mii syi.

19 N nii wãã n tãŋ ma kê poo wĩ na, ke syi pe bye n waha sroŋ nii ma wãm pe ya ndoŋ, ma cĩnde kãmaya na.

20 N sê -sê ma nar poo ya wĩ ne ye. Mpãy bye pe ga ba poo kaplãŋ sya, pe ra ta pe Yater, n ma nar pe bya wĩ na.

21 N ma nar pe bye n waha wãã le, pe nii yĩmbui nen na. Too nii nen wii wo syãm ma ne, n ma nar pe waha nii koo syi dyaŋ, poo tesê wo syãm ne. Driyêfa n loo yãã, pe cã pe yee, mboo taa ra lehe wãã.

22 Nayõr rii taa wãã ra kê, n te syi wãã pe kê, pe n waha nii nen mii wo dyaŋ too ma nen.

23 Wo ma nen, mboo ra ne; tesê wo ma nen, ndoo poo ne. Loo ga ta pe n wãã le, pe nii yĩmbui nen na. Ke syi, driyêfa ga cã pe yee, mboo ma ra lehe wãã, tesê ra ntãŋ pe dye ma tãy mii, ta nawee- bya ntãŋ dye ma tãy koo syi.

24 Ta Tuhufua, mpãy taa wãã ra kê, n n traha pe ba pye ra ne fla ngii na n n pai pye. Koo syi, pe ga waha ra nayõr yãã yĩnde ne, tii taa wãã ra kê. Driyê sê bii tãhã wa ye, ta ntãŋ bii dye ma tãy, koo kê.

25 Ta Tuhufua, mboo wii taa sroŋ, driyêfa sê

ma cã ye, ndoo -sẽ ma cã, ta nawee- bya cã mboo taa ra lehe wãã.

²⁶ N ta poo n ma myaha cã, n ga ta kaa naa n taha ke wãcãŋ na pe ye. Koo syi, ta ntãŋ pe dye ma tãy mii, pe bya n waha nii ke syi, ta wĩ n maha nii pe laam wo.»

18

Yesu wãyigi

(Mat 26.47-56; Mar 14.43-50; Luke 22.47-53)

¹ Yesu tuu ba Yãhã nar wa, u n ka u kãnyãrwai ne Sedrõ lankloŋ kũndi ye. Katyir lankua waa pye ke fla na. Pe n dye u katyir lankua laam wo.

² Pe naa n gaha koo fla na soo. Yuda wii tuu yi Yesu kur ye, u bya ba ke fla saha cã. U n ke fla saha yar Yesu napĩ- na.

³ U n ka Wõrmefa seraasyi ndreŋ ne, ma suhu ke Yãhã kangbãŋ sẽŋfa ne u katyir lankua wo. Pe Yãhã yũndefa yĩŋfa, tesẽ pe Farisyẽ ne, poo me pe ba pe lehe wãã. Terbuhu pye pe ye, tesẽ naaloho ndyan ne, ma suhu naanmiy wãn ne.

⁴ Yesu tuu -sẽ ba cã wa lii le ga ba u dye, u n pe wãã ga, maa pe yey: «Yoo tee n ke?»

⁵ Pe n u pye ma yey: «Nasaretefa Yesu too n ke.» Yesu n yee: «Ndoo tẽ ma woo.» Loo yale wo Yuda pye u ba yer pe ne, Yuda wii tuu pye Yesu yifua u napĩ- kẽ.

⁶ Yaliile Yesu le pãã ma yee, ndoo tẽ ma woo, pe n kũn dur kur kuẽ ne, ma laha n too.

⁷ U n pe yey yahamba: «Ah yoo tee n ke?» Pe n maha u pye: «Nasaretefa Yesu.»

⁸ U n yee: «N sē le pāā wa la ye ye, ma yee ndoo tē ma woo? Ke ma pye ndoo tee n ke, ye tyii ta kānyārwei na, pe n ter.»

⁹ Tuu loo pāā ke syi, lii u naa n pāā Yāhā ye ke yīmper wo, loo ne le pye. Loo ne nde: «Yāhā, nawee- mpāy taa ba wāā ra kē, nawee nen ge sē plaha ra ye ye.»

¹⁰ Syimu Pyar -sē pye yūntrūhū ne. U n le tyīn yi yūnsyihi wo, ma Yāhā yūndefa yīnfua tēntē Malsyii kāndigi nditye gbā cer.

¹¹ Loo na, Yesu n u Syimu Pyar pye ma yee: «Ma yūntrūhū le yūnsyihi wo. Ma sē cā la n yai n ke kayīhī sya, kii ra Tuhufua Yāhā tuu wāā ra kē?»

¹² Yesu tuu kāhā loo nde pāā wa, nawee- mpāy pe pye Yuda ne, pe n Yesu yigi, ma u pua,

¹³ ma cāā ka u ne Yana fla na, Yāhā yūndefa yīnfua mpāy waa. Loo dye Kayifu woo tuu ba Yāhā yūndefa yīnfara yāā. U ba Yana pueesya sya cōō.

¹⁴ Woo kē tuu maha ba Yiifee- yahaseefa pye ma yee, a ter nawee nen ma ku nabuar wī na, koo ke puar.

Pyar Yesu wī kai

(Mat 26.69-70; Mar 14.66-68; Luke 22.55-57)

¹⁵ Syimu Pyar tesē Yesu kānyārwe waa ne, pe n taha Yesu na, ma ka Yana fla na. Yāhā yūndefa yīnfua ba u kānyārwe nen nwo cā le wa, woo n waha dye u Yāhā yūndefa yīnfua kangbān ndyin wo.

¹⁶ Syimu Pyar ya n kuee kāndi wo kapahayē na. U kānyārwe wii tuu u Yāhā yūndefa yīnfua

cã, u n ka maa pãã u kapahayẽ sêṅsyale ne, ma Syimu Pyar yigi dye loo na.

¹⁷ Ke kapahayẽ sêṅsyale n u yey ma yee: «Ah ndee, dya nwo kãnyãrwai waa kē ma bya ne!» Pyar n yee: «Aye, poo waa sē kē ra ne ye.»

¹⁸ Wɛr tii naa n pai ke dyaṅ, pe tēntē- tesē pe Yāhã kangbãṅ sēṅfa mpāy ne pe pye ke fla na, pe ba naa tar, ma naa n waha. Pyar bya pye pe ne, ma naa naa waha.

U Yāhã yūndefa yīṅfua Yesu yey

(Mat 26.59-66; Mar 14.55-64; Luke 22.66-71)

¹⁹ U Yāhã yūndefa yīṅfua Yana n Yesu yey ma yee: «Mpāy poo pe ma ma kãnyãrwai? Kai- nkāy syi koo taa nawee- klaha?»

²⁰ Yesu n u yē wãã sya ma yee: «N ba naa nawee- klaha Yiifee- yawāhã nwey wo, tesē Yāhã kangbãṅ wo, Yiifee- bye naa pe ya wãã too flɛ nde wo. N ke kai- bye pãã naa n yi, n sē kaplãṅ nkāy wūhū naa n pãã ye, nawee- bye ke cã.

²¹ Nwa ta ma n nii le yey ndoo ye? Le ma pye ke dyaṅ, mpāy pe naa ta kaplãṅ luhu, le yey poo ye, poo le cã.»

²² Tuu naa n pãã ke dyaṅ, pe Yāhã kangbãṅ sēṅfa mpāy pe pye ke fla na, poo nen waa n u fey, ma u pye ma yee: «Nwa ta ma n nii n pãã Yāhã yūndefa yīṅfua ne ke dyaṅ?»

²³ Yesu n u pye ma yee: «N ma tee pãã, le tōr ra ye lii tē pãã wāpee. Ke ma -sē pye cīinde tē pãã, nwa ta ma n ta fey?»

²⁴ Loo kur ye, Yana n Yesu nɔ wãã u Yāhã yūndefa yīṅfua Kayifu fla na. Ke namihi pye u na nantãṅ, pe ba u pua yigi.

*Pyar maha Yesu wĩ kai**(Mat 26.71-75; Mar 14.69-72; Luke 22.58-62)*

²⁵ Pyar woo -sẽ pye u naa naa waha. Waa n u yey yahamba: «Ah ndee, u dya nwo kãnyârwe waa kē ma ne?» Pyar n maha le kai ma yee: «Aye, poo waa sē kē ra ne ye.»

²⁶ U Pyar tuu -sẽ ba dya wii nditye gbã cēr Yesu yigiyale wo, u dya pye Yãhã yũndefa yĩnfua tēntē waa nwonfua. Woo tēntē n Pyar yey yahamba: «Ah, n sē ma yãã la Yesu ne katyir lankua wo?»

²⁷ Pyar n maha le kai ma yee u sē Yesu cã ye. Ngupuai n -sẽ ta ter kui.

*Pe ka Yesu ne fãngafua Pilati fla na**(Mat 27.1-2, 11-14; Mar 15.1-5; Luke 23.1-5)*

²⁸ Ke yĩnsyii sukũhũntãy yĩn na, pe n Yesu yigi yi Kayifu fla na, pe bye n wãã ga u ne u fãngafua tēntēsaha wo, kangbãñ gaa ba kē. U fãngafua myaha ba kē Pilati. Pe Yiifee- sē -sē ba dye ke kangbãñ laam wo ye, u fãngafua tee pye kulaafua. Pe ma ne dye, pe saa ne waha te syayaha gbar dir di ye.

²⁹ Loo na Pilati n yi u kaha wo, ma ka pe kue ye, maa pe yey ma yee: «Lii kapee ne u dya tuu pye?»

³⁰ Pe n u yẽ wãã sya ma yee: «Dya nwo ma ne yee u wee kapeepyefua ye, wo saa ne pye too u yigi ba ma fla na ye.»

³¹ Pilati n pe pye ma yee: «Le ma pye ke dyañ, ye u sãhã ye klo kai- kãnde na.» Pe n yee: «Ye

kānde* na, wii Yiiffee-, wo sē yai wo nawee boo ye.»

³² Pe loo pã ke syi, kai- nkāy Yesu tuu ba cãã pãã yaha faale wo u ya gbã wĩ na, koo kai- kē ke nii n pye loo yale wo.

³³ Pilati n dur dye ter u nangbãṅ kaha wo, ma ta pe n Yesu yee ba. U n ba u yey ma yee: «Mboo la pe Yiiffee- yĩṅfua?»

³⁴ Yesu n -sē u yey: «Ma le cã mii ya laa, mpãy me pe le pãã ma ye?»

³⁵ Pilati n u pye ma yee: «N wee Yiiffee- terfua ye. Ma terfa Yiiffee-, tesē Yāhā yũndefa yĩṅfa ne, poo pe ma yigi ba wãã ra kē. Le pãã ra ye lii taa pye.»

³⁶ Yesu n u pye ma yee: «Ta yĩṅfar wee driyẽ nge wo ye. Le ma ne pye ke dyaṅ, ta nawee- ga ne naan miy ta draha wo, ta napĩ- ma n waha ra yigi ye. Ta yĩṅfar sē -sē wee driyẽ nge wo ye.»

³⁷ Loo na Pilati n -sē u pye ma yee: «Jaha ma ma yĩṅfua?» Yesu n u yẽ wãã sya ma yee: «Áwã, taa le pãã mii, n ma yĩṅfua. N see nawee, ma pa driyẽ laam wo, ma ba cĩnde yar nawee- na. Cĩnde le n tãy nawee- mpãy ye, pe n luhu ra ye.»

³⁸ Pilati n u pye ma yee: «Ah nwa kē cĩnde ne?»

*Pe Yiiffee- Pilati ta u n Yesu wãboo wĩ ta
(Mat 27.15-31; Mar 15.6-20; Luke 23.13-25)*

Pilati tuu loo pãã wa, u n yi ga maa Yiiffee- wãã sya kãndi wo, ma pe pye ma yee: «Ye dya nwo yigi ba ra kē, n sē -sē laa kapee yãã u na ye.

* **18:31 18.31** Koo cãã na, Wõrmeḡa fãṅgafa ya bii me pe ga waha nawee wãboo wĩ ta. Loo ne, pe Yiiffee- yahaseḡa n ka Yesu ne Pilati fla na.

³⁹ Dyε- byε syayaha gbar na, ye sē ne pa la, ye yee ndoo n nwompihifua waa yi yaha ye kē? Ya’ a sya, n ga Yiifee- yīnfua yi yaha ye kē naandyε.»

⁴⁰ Pe Yiifee- n nii n tē ma yee: «Aye, wo wee woo wī na ye, wo n traha ma Barebaa woo yi yaha wo kē.» U Barebaa -sē pye yuhu naboofua.

19

¹ Loo kur ye, Pilati n ta pe n Yesu gbā sāngblā ne.

² Pe seraasyi n nii u lεr, ma yīnfua nayreyāhā le u na, ma ngur maha ta u yīn na yīnfua nkifai dyaŋ,

³ ma dur ma nii yūhū n crā u na, ma nii u lεr yīnfua syaha ne ma yee: «Yiifee- yīnfua wo ma syar», ma -sē maha nii u fey.

⁴ Loo kur ye, Pilati n maha yi ba pe Yiifee- fla na, maa pe pye ma yee: «Ye tyii, pe n yi ba u ne kāndi wo. N n traha n -sē le pāā ye ye, ndoo sē laa kapee yāā u na ye.»

⁵ Loo na, Yesu n yi ke yīnfua nayreyāhā ne, tesē ke ngur nkifai ne u yīn na. Pilati n -sē pe pye ma yee: «U dya nwo.»

⁶ Yaliile pe Yāhā yūndefa yīnfa, tesē pe nawee- ne pe u yāā, pe nii n tē ma yee: «U kuey mar boo trā na! U kuey mar boo trā na!» Pilati n pe pye ma yee: «-Ye u kuey mar boo yii ya, ndoo sē laa kapee yāā u na ye.»

⁷ Pe n u yē wāā sya ma yee: «Wo kānde na u yai u ku, u tee yee woo ma Yāhā Dya.»

⁸ Pilati tuu pe kaplāŋ luhu Yesu wī na, u n fya ma ta ter faale yaha.

⁹ U n dye ga u tēntēsaha kangbāŋ wo, maa Yesu yey ma yee: «Ah ma n yi na cigege?» Yesu sē -sē u yē wāā sya ye.

¹⁰ Pilati n -sē u pye ma yee: «Ah ma saa ndoo ge yē wāā sya la? Ma sē cā la fānga ma ra ye, ta n ga waha ma yi yaha, le ma maha tāy ra ye, n ta pe n ma kuey mar boo trā na?»

¹¹ Yesu n u yē wāā sya ma yee: «Ma saha fānga wī laa pye ra na ye, n sē sye Yāhā ma fihī lii wāā ma kē. Koo syi, wii tuu ra yigi wāā ma kē, woo kapee ter ma wī yaha.»

¹² Loo yale wo, Pilati naa Yesu wāyiyaha wī ke. Pe Yiifēe- poo -sē nii n tē fānga ne ma yee: «Ma 'a u dya miy yaha, ma wee fāngafa bye yīŋfua naambiyā ye. Nawee nawee ma u ya ta yīŋfua, u ma fāngafa bye yīŋfua napī.»

¹³ Pilati tuu koo kaplāŋ luhu wa, u n ta pe n Yesu yigi ga kāndi wo. Pilati n pa, maa tege nii kasāhāfua niisaha wo, draha gii pe naa n yee ntēmbapai fla, pe naa ke yee Gabata yeberε yor wo, Yiifēe- yor kē.

¹⁴ Te syayaha gbar ne ga dye koo per yīŋsyii wo. Koo per yaiwlan yale ba kē, Pilati tuu pye u ba tege nii kasāhāfua niisaha wo, u n Yiifēe- pye ma yee: «Ye yīŋfua nwo.»

¹⁵ Pe n -sē nii n tē ma yee: «U boo, u boo, u kuey mar boo trā na!» Pilati n pe pye ma yee: «Ah ye yīŋfua kē, ye -sē yee, n u kuey mar mii syi?» Pe Yāhā yūndefa yīŋfa n yee, a yīŋfua waa wee poo ye, mii u fāngafa bye yīŋfua sē kē ye.

¹⁶ Loo na, Pilati n pe laam wī pye, ma Yesu wāā seraasyi kē, pe ga u kuey mar yaha trā na.

U fãngafua seraasyi Yesu kuey mar yir yaha trã na

(Mat 27.32-44; Mar 15.21-32; Luke 23.26-43)

Pe seraasyi n Yesu yigi ter,

¹⁷ ma yi u ne le klo wo. U n u kueymartrã tẽn u ya ya. Teelii fla pe n yee Gblegbeta Yiiffee- yor wo, le yĩntaha kě yĩnkluhu fla, pe n ka koo fla na.

¹⁸ Koo fla pe Yesu kuey mar yir yaha trã na, ma maha nawee- syãm mpãy kuey mar yir yaha u kãnkãy na pe ya wuhu na, Yesu pye pe telai wo.

¹⁹ Pilati n ta pe n wãŋ gaa gbe, ma yrũhũ ke na, ma ga ke gbãã yaha le trã na ncha ye. Pe ba yrũhũ ta ma yee: «nasarɛTEFA YESU, YIIFEE-YĨŋfua kě.»

²⁰ Ke kaplãŋ ba yrũhũ ta yor flɛ tãã wo, Yiiffee-yor, tesě Wɔrmefa yor ne, ma suhu Jrɛkɛfa yor ne. Draha gii pe ba Yesu kuey mar yir yaha trã na, ke fla pye klo tãy tũntũn. Ke n ta Yiiffee- busãã n ke wãŋ yãã, ma kal.

²¹ Pe Yãhã yũndefa yĩŋfa n ka Pilati fla na, maa u pye ma yee: «Kaplãŋ ngĩ ke yrũhũ ta nii ma yee, Yiiffee- yĩŋfua kě u ne, ma sě yai ma tyii ke na ye, ma yai ma ta pe n yrũhũ ta, a dya nwo yee woo ma Yiiffee- yĩŋfua.»

²² Pilati n pe pye ma yee: «Tě lii yrũhũ ta, le ga kuee loo na.»

²³ Pe seraasyi pe Yesu kuey mar yir yaha wa le trã na, pe n u nayrɛ gbe, ma la flɛ resyar. Pe byɛ n fla nanɛŋ gbe. Pe n maha u nayrengbãŋ gbe, pãhãsa sě pye ke na ye. Ke ba tyĩn fai nen ya.

²⁴ Seraasyi n pe ya pye ma yee: «Wo ma syi wo ke nayrengbãŋ tyĩn jũũ ye, -too pyer raa pye,

wo cã ke ga nii wii wãŋ.» Pe koo pye wa ke syi, kapãn lii le bii cãã yrũhũ ta nii Yãhã sabangbãŋ wo, loo ne le pye loo yale wo. Loo kapãn ne nde:

«Pe ra nayrɛ la pe ya nsoho wo;
 ta nayrengbãŋ koo na,
 pe pyer raa pye, maa cã ke ga nii wii wãŋ.»
 Pe seraasyi -sẽ le pye koo syi.

²⁵ Yesu nahafua pye u ba yer Yesu kueymartrã tãŋ, tesẽ Yesu nahafuasyĩnde ne, ma suhu Klopa cɔɔ Maari ne, tesẽ Madalafa Maari ne.

²⁶ Yesu tuu u nahafua yãã, tesẽ u kãnyãrwɛbua ne, pe yir yer u kueymartrã tãŋ, u n u nahafua pye ma yee: «Yaa, dya nwo woo ma ma dya yagaa.»

²⁷ U n u kãnyãrwɛ pye ma yee: «Nwo woo ma ma nahafua yagaa.» Koo per u kãnyãrwɛ n Yesu nahafua yigi ga ta u ya tãŋ u kuãŋ ne.

Yesu wãku

(Mat 27.45-56; Mar 15.33-41; Luke 23.44-49)

²⁸ Yesu ba cã kai- nkãy ke ne ga u dye, ke byɛ u yãã wa yagaa. U n yee: «Loho fãã ra yigi.» Tuu loo pãã wa ke syi, kapãn lii le ba cãã yrũhũ ta nii Yãhã sabangbãŋ wo u wĩ na, loo ne le pye loo yale wo.

²⁹ Gblãhã gaa pye ke fla na, ke ba yĩ de-fĩtãhãpihi ne. Seraasyi n flũhũflũhũ wãŋ gaa gbe, ma kã le ke defĩtãhãpihi wo, ma ke wra ta katiyigi gaa kayan na, ke katiyigi myaha yisope. Pe n ke wãŋ kuã yir ta Yesu yẽ tãŋ.

³⁰ Yesu tuu ke defĩtãhãpihi wãr wa, u n yee: «Ke kai- byɛ kua wa,» ma yĩŋ kue tege, ma ku.

³¹ Pe Yiiffee- yahaseefa sê naa n traha te nakur n yai kua ke trãŋ na ye, pe kani per ga ne fe gbe yainkɔŋ wo, koo kê. Koo kani per ba wãã dye pe syayaha gbar ne. Koo syi kê, pe n ka klo laam wo, maa Pilati nar ma yee, a nawee- mpây pe kuey mar nii trãŋ na, tuu kãnde wãã seraasyi kê, pe n ga pe trɛ gbã ka pe n ku farfar, pe n pe tege kãã ke trãŋ na. Pilati n kãnde wãã seraasyi kê.

³² Nawee- syãm mpây pe ba kuey mar yir yaha trãŋ na pe ya wuhu na Yesu tây, pe sê ba ku wa ye. Pe seraasyi n -sê ga pe trɛ gbã ka.

³³ Yaliile pe ga nɔ Yesu na, maa yãã tuu ku wa, pe sê woo trɛ gbã ka ye.

³⁴ Seraasyi nen waa n -sê Yesu mpïy kã fer u nceŋ ne, ntõr n ta ter yi ma suhu loho ne.

³⁵ Wii tuu koo kai- ngĩ yãã, u ke yar nawee- na. Kai- nkây tuu yar ke ma cĩnde, u cã u cĩnde pãã, loo na ye byɛ n waha Yesu wĩ sya cĩnde.

³⁶ Koo kai- pe seraasyi pe pye, kaplãŋ nkây ke bii cãã yrũhũ ta nii Yãhã sabangbãŋ wo, koo kê ke naa n pye loo yale wo. Koo kaplãŋ ngĩ: «Pe saa u kacrihi neŋ gɛ yoho ye.»

³⁷ Yãhã sabangbãŋ kapãn laa maha nde: «Wii pe kã fer, pe ga ba u yãã.»

Yesu wãleŋ gbũ wo

(Mat 27.57-61; Mar 15.42-47; Luke 23.50-56)

³⁸ Dya waa pye, u myaha ba kê Yosɛfe, Yari- matefa naa waa ba kê. U pye Yesu kãnyãrwai waa, u sê -sê ba ta waa n yi le cãŋ na ye, u tee naa n fya Yiiffee- yahaseefa na. U n pa, maa Yesu nakugu nar Pilati ye. U n kãnde wãã u kê. U

Yosefe n ka, maa ta pe n Yesu nakugu tege le trã na.

³⁹ Nikodemu wii u ba ka faale wo Yesu fla na yĩmper wo, u n ka sēm- ter gbengbeyĩhĩ syāŋ syi ne. Pe sēm- ba gbihi katyir sī wān ne, myer katyigi, tesē yaluee katyigi ne.

⁴⁰ U Yosefe, tesē u Nikodemu ne, pe syām n Yesu nakugu gbe, ma nii ke tuhu pe miy ne, ma nii ke maha faasyĩmbɛhɛ ne. Yiifɛe- kãnde wo, pe maa nakugu le, pe ne ke gbihi koo syi.

⁴¹ Draha gii pe ba Yesu kuey mar trã na, katyir lankua pye ke fla na. Gbĩifuẽ pye ke fla na, le ba gbã fer* ntẽmbɩaha fla wo, pe sē ba nakugu gaa le yãã le wo ye.

⁴² Le pye tũntũn. Pe n dye Yesu nakugu ne, ma ke sã y ta le gbĩifuẽ laam wo. Pe yai pe ne pye farfar, yainkɔŋ wo kani per ga ne nɔ, koo kē.

20

Yesu wã yir gbã wo

(Mat 28.1-8; Mar 16.1-8; Luke 24.1-12)

¹ Ke cãwãã per cir* yĩnwɔŋ wo, Madalafa Maari ye n ka le gbĩ fla na, maa yãã ntẽmbangbãŋ gii ke ba tã le gbĩ yẽ na, ke gbe kãã.

² Tuu le yãã ke dyaŋ, u n fã ga Syimu Pyar fla na, tesē u Yesu kãnyãrwɛbua ne, maa pe pye ma

* **19:41 19.41** Le gbĩ pye nkɔŋ pe gbã fer yãŋ mpĩy ntẽmbɩaha fla wo, ma le laam ta wɛŋwɛŋ, le yẽ ne nwonyẽ dyaŋ. Le yẽ n tã ntẽmbangbãŋ ne. * **20:1 20.1** Koo per kē jimaasyi per ne.

yee: «Eh, pe wo Yīnfua nakugu yi kãã le gbĩ wo, wo sē cã pe u ta na ye.»

³ Pyar tesē woo kãnyārwe ne, pe n yi, ma n gaha le gbĩ fla na.

⁴ Pe naa n fã pe syām pe ya tãy, u kãnyārwe nwo naa n fã farfar ma ter Pyar yaha; woo n ga cãã dye le gbĩ fla na.

⁵ U n kue tege, ma yãŋ le wãã ma faasyĩmbehe yãã le gbĩ wo, nkãy pe ba Yesu nakugu maha tã ke ne. U sē -sē dye ye.

⁶ Syimu Pyar n pa u kur kue ye, maa ta ter dye le gbĩ wo, ma ke faasyĩmbehe yãã ke fla na,

⁷ ma suhu fai lii ne pe ba maha Yesu yĩŋ na, le pye le ya ya, le sē pye ngĩ ne ye.

⁸ Loo na, u kãnyārwe wii tuu ba cãã dye le gbĩ fla na, u bya n -sē dye le laam wo u ya ndoŋ. Tuu ke faasyĩmbehe yãã ke dyaŋ, u n Yesu wĩ sya cĩinde.

⁹ Pe kãnyārwai sē -sē ba Yãhã sabangbãŋ kaplãŋ war wa ye, nkãy ke yee, a Yesu ga yir gbã wo, u dur ba yrãŋ na.

¹⁰ Pe kãnyārwai syām n dur ter pe fla na.

*Yesu u ya yar Maari na
(Mat 28.9-10; Mar 16.9-11)*

¹¹ Maari n dur ga le gbĩ fla na, ma ga nii n wũn. Tuu naa n wũn, ma kuee yãŋ le n wãã le gbĩ wo,

¹² u n yãhãyĩŋ tẽnlehe syām mpãy yãã. Pe kale wãn pye wãfir. Pe ba tege nii teelii wo Yesu nakugu ba sãy ta. Nen pye yĩŋ kue ye, u syãŋ wuhu -sē pye tre kue ye.

13 Pe n u pye ma yee: «Coo, lii raa n wûn?» U n pe yẽ wãã sya ma yee: «Waa ra Yĩnfua nakugu gbe kãã, n sê -sê cã u ke ta na ye.»

14 Yaliile Maari tuu naa n pãã, u n wã klaha, ma Yesu yãã tuu yir yer ke fla na, u sê -sê ba cã Yesu kě ye.

15 Yesu n u pye ma yee: «Coo, lii raa n wûn, yoo raa n ke?» Maari n le ga ma yee katyir lankua sēnfua kě. U n u pye ma yee: «Ke ma pye mboo raa u nakugu gbe, le pãã ra ye taa ke ta na, ta n ga ke gbe ba le.»

16 Yesu n u myaha yee ma yee: «Maari.» Maari n klaha yãñ, ma u pye Yiiffee- yor wo: «Arbuni,» koo yĩntaha kě yĩnfua.

17 Yesu n u pye ma yee: «Ma'a n ta yigi yaha ye! Ma sê yãã, n sê dugu ga wa ra Tuhufua Yãhã fla na ye. -Taa -sê ka ra nampyeñ- fla na, maa pe pye, a ndoo ga dugu ga ra Tuhufua fla na, wii u ma ye bye Tuhufua, ma maha ma Yãhã ra ye, tesẽ ye bya ye.»

18 Maari n ka, maa le pãã pe kãnyãrwai ye, a woo u Yĩnfua Yesu yãã. U n maha Yĩnfua Yesu tēnlehe bye tōr pe ye.

Yesu u ya yar u kãnyãrwai na

(Mat 28.16-20; Mar 16.14-18; Luke 24.36-49)

19 Koo per yĩmper wo, ke pye cãwãã per cir, pe kãnyãrwai ba pe ya wãã ta nwongbãñ gaa wo, ma te kããnklee gbãã tã, pe tee naa n fya pe Yiiffee- yahaseefa na. Yesu n fer gbe yi pe laam wo, ma pe syar ma yee: «Yãhã n yrĩñ wãã ye kě.»

²⁰ Tuu ba pãã wa ke dyaŋ, u n u klue yar pe na, tesẽ u mpïy ne. Pe kãnyãrwai n too yãã, ma u yãŋ cã, pe laam n fihĩ flege.

²¹ U n maha pe pye: «Yãhã n yrĩŋ wãã ye kẽ. Ta Tuhufua Yãhã tuu ra lehe wãã mii syi, ndoo bya n -sẽ ga ye lehe wãã koo syi.»

²² Tuu loo pãã wa, u n tefay fua woo pe na, ma pe pye ma yee: «Ye tyii Yãhã Yrã Fãnga n dye ye laam wo!

²³ Ya'a mpãy kapee- laha kãã pe na, ke ga kua pe na, ya'a -sẽ mpãy kapee- sye yaha pe na, ke ga kuee pe na.»

²⁴ Yesu tuu ba u ya yar u kãnyãrwai na, Tema wii pe naa n yee Didim, koo yĩntaha wuhuwãã, woo sã pye pe laam wo ye. Pe kãnyãrwai sãnsye syãm mii waa ba kẽ.

²⁵ Pe kãnyãrwai mii n -sẽ le pãã u ye, poo u Yĩŋfua yãã. U n -sẽ pe pye ma yee: «N ma yee n sã pe puẽnte kueysar yãã u klue na, ma ta kãnde te te na ye, tesẽ n ma yee n sã ra koho le u mpïy nadyaha fla na ye, n saa le sya u yir gbã wo ye.»

²⁶ Plii kuatãã n ba no, pe kãnyãrwai n maha ba pe ya wãã ta ke nwongbãŋ wo, Tema pye pe ne. Te kããnklee ba gbãã tã, Yesu n fer gbe yi pe nsoho wo, ma pe syar ma yee: «Yãhã ke yrĩŋ wãã ye kẽ.»

²⁷ U n Tema pye ma yee: «Tema, ta klue yãŋ, pa ma ba te yãŋ te na! Ma koho yũhũ ba le ta mpïy fla na; ma tee ba yee ma sã ta wĩ sya cĩnde ye. Yagaa le sya cĩnde, ndoo yir gbã wo!»

²⁸ Tema n u yẽ wãã sya ma yee: «Mboo ta Yĩŋfua, mboo ta Yãhã.»

²⁹ Yesu n u pye ma yee: «Taa ra yãã, koo kě ma n le sya cĩnde. Mpãy pe sě le yãã ye, ma -sě le sya cĩnde, poo wĩ n tãy.»

Yesu tuu kai- nkãy pye

³⁰ Cãã gii bye Yesu tuu pye u kãnyãrwai ne, u ba laanwo wũhũ busãã pye, koo bye sě yrũhũ saba nwo wo ye.

³¹ Kai- ngĩ -sě yrũhũ ta saba nwo wo, ma yee ye le sya cĩnde Yesu woo kě u Yãhã Yĩndefua Crise. U maha ma Yãhã Dya. Ya'a u ta ye Yater, ye ga cĩnde yrã yãã, lii wãkuayãã wee le na ye.

21

Yesu laanwo wĩ pye fuayigisaha wo

¹ Loo kur ye, Yesu n u ya yar u kãnyãrwai na Galɛɛ langbãŋ yě na, klo laa tãy pe naa n yee Tyiberyati. Tuu u ya yar pe na mii syi, le nde.

² Per gaa, Syimu Pyar, tesě Tema ne wii pe naa n yee wuhuwãã, ma suhu Natanelu ne, u naa n yi Kana wo Galɛɛ kuɛ ye, tesě Sewede dyam ne, ma suhu kãnyãrwai syãm mpãy ne pe pye pe ya ne.

³ Syimu Pyar n pe pye ma yee: «Ndoo n gaha fuayigisaha wo.» Pe n u pye ma yee: «Wo bya ga ka ma ne.» Pe n yi, maa dugu dye salangbãŋ wo, ma nii joo miy yahasee ye. Koo yĩmper bye wo, pe sě ngaa yãã ye.

⁴ Yũhũ ke ba syii, Yesu n pa, maa yer langbãŋ yě na. Pe kãnyãrwai n u yãã, pe sě -sě ba cã woo kě ye.

⁵ U n pe pye ma yee: «Ta cĩfa, ye sě fua- yãã yigi la?» Pe n yee: «Aye, wo sě ngaa yãã ye.»

⁶ Tuu loo luhu, u n pe pye ma yee: «-Ye u joo miy le yagaa ke salangbãñ kãndigi kue ye, ye ga yigi!» Pe n -sẽ u joo miy le, ma yãã pe saha u joo tyĩn ba le ke salangbãñ wo ye, u ba yĩ fua- ne, koo kē.

⁷ Pe loo yãã, u Yesu kãnyãrwẽbua n Syimu Pyar pye ma yee: «Eh, wo Yĩnfua kē.» Pyar -sẽ pye kadyepua ne. Tuu loo luhu, u n u nayroho gbe le, ma too loho wo, ma ga ka farfar.

⁸ Loo yale wo, pe kãnyãrwai sē ba dey langben na ye. Pe n nii n pai ke salangbãñ ne, ma nii u joo tyĩn n taha pe ya na, u ba yĩ fua- ne.

⁹ Pe ga tege kãntraha na, pe n fua- yãã naankãhã na, bur ne kãnkãy na.

¹⁰ Yesu n pe pye ma yee: «Ta cĩifa, fua- mpãy tee yigi, -ye pa mpãy ne!»

¹¹ Syimu Pyar n dugu dye ke salangbãñ wo, ma u joo fle yi. U ba yĩ fuababai gbeekuasĩ sēnsye tãã ne. Pe fua- wãnihi naa bye ne, u joo sē ceɛ ye.

¹² Yesu n pe pye ma yee: «-Ye pa yaa di!» Pe ba u yãñ cã, waa sē u yey ma yee yoo kē u ne ye.

¹³ U n yũhũ dye pe tãy, ma bur gbe ma naha ka la pe kē, fua- ne.

¹⁴ Tuu ku ma yir gbã wo, u tẽhẽ tãã wuhu kē tuu u ya yar u kãnyãrwai na.

Yesu Pyar yey laa ne tẽhẽ tãã

¹⁵ Yaliile pe ba di wa, Yesu n Syimu Pyar yey: «Nsân dya Syimu, ta ntãñ dye la ma tãy, ma ta ter mii mii yaha?» U n u yẽ wãã sya ma yee: «Ãwã, Yĩnfua, ma cã ma wĩ n tãy ra ye.» Yesu

n -sê u pye ma yee: «Ta nawee- yigi yõ mbanaha wãñ syi dyañ u mbapĩy ne!»

16 U n u yey tɛɛ syãñ wuhu na ma yee: «Nsân dya Syimu, ta ntãñ dye la ma tãy?» U n u yẽ wãã sya ma yee: «Áwã, Yĩñfua, ma cã ma wĩ n tãy ra ye.» Yesu n u pye ma yee: «Naa ra nawee- yãñ mbanaha wãñ syi dyañ u mbapĩy ne!»

17 Ke tɛɛ tãã wuhu na u n u yey: «Nsân dya Syimu, ta wĩ n tãy la ma ye?» Pyar laam n wlãhã, tuu u yey ke tɛɛ tãã wuhu na, a u wĩ n tãy la u ye. U n u pye ma yee: «Yĩñfua, mboo taa kai- byɛ cã, ma cã ma wĩ n tãy ra ye.» Yesu n u pye ma yee: «Ta mbapĩy yigi yõ!»

18 Ta n kapãn laa pãã ma ye, taa pye naanfuẽ, ma naa mii pua mii ya, ma naa n gaha teelii ma ma tãy. Ma 'a -sê ba ɛ, maa ba klue kuã naa n yir, waa n naa ma pua nayɛ wãñ ne, u naa n gaha ma ne teelii le sê n tãy ma ye ye.»

19 Kaplãñ ngĩ le yar, Pyar ga ba gbã mpãy ter ku, u Yãhã myaha gboho ke syi. Yesu tuu loo pãã wa, u n u pye ma yee: «Naa n taha ra na ma kuãñ ne!»

20 Pyar n klaha yãñ kur kue ye, ma Yesu kãnyãrwebua yãã tuu n taha pe na. Per gii pe ba kur kue digi wãã di Yesu n cã ku, woo kãnyãrwe kē tuu ba yũhũ dye Yesu tãy, ma u pye ma yee tuu le pãã woo ye, a wii woo tuu ga ba yi kãã u kur ye.

21 Pyar tuu ba u yãã, u n Yesu yey ma yee: «Yĩñfua, ah woo, lii loo le ga ba u dye?»

22 Yesu n u yẽ wãã sya ma yee: «N ma sya n traha u kuee driyẽ wo ta n sya ba dur ba, ma

kalaa wee ye. Mboo, naa n taha ra na ma kuāŋ ne!»

²³ Yesu nawee- n nii le pãã pe ya nsoho wo, a u kãnyãrwε saa ku yãã ye. Yesu sē -sē ba le pãã Pyar ye, a u kãnyãrwε saa ku yãã ye. U ba yee, a le ma tãy woo ye u kuee driyẽ wo woo n sya ba dur ba, u kalaa wee ye.

²⁴ Woo kãnyãrwai kē tuu kai- ngĩ tõr nawee- ye, ma ke yrũhũ ta. Wo byε, wo cã lii tuu pãã le ma cĩĩnde.

²⁵ Yesu maha kai- busãã pye. Pe ma ne ke byε yrũhũ naa n ta sabar wo, n sē le sya te tasar ga ne yãã driyẽ kur byε wo ye.

YĀHĀ NAAMBIYĀRFĀN SABA
Karaboro, Eastern: YĀHĀ NAAMBIYĀRFĀN SABA
New Testament

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

PDF generated using Haiola and XeLaTeX on 18 Apr 2025 from source
files dated 29 Jan 2022

15120496-00e2-503a-8d40-2d7cfdc1ba5b